

ASO TOFI, 23 IUNI 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono. Ua maleifua mai i le lagi e mama le paia o le tatou Maota i lenei taeao fou, viia le Alii i Lona agalelei.

E faatalofa atu ai i a outou Afioga i sui usufono mamalu, lau Afioga i le Sui Palemia ma le mamalu o le Kapeneta, a outou Afioga i Minisita Lagolago, afio foi lau Afioga i le Sui Taitai o le Itu Agai faapea foi sui usufono mamalu uma o le Palemene.

Ua tatou le mafuta faatasi foi ma le Taitai o le Malo, aemaise nisi o sui usufono mamalu o faataotolia i gasegase, aemaise foi o tuatuaigia faaleaiga ma mataupu tau i o latou itumalo, ia tatou talosia i le alofa o le Atua faamoemoega o feagai ai.

Le alofaiva o le Maota i lenei taeao, e faamoemoe atu lava le Nofoa i le tatou galulue faatasi e sologa lelei ai le tatou galuega. Ia alolofa foi i saunoaga a sui usufono mamalu o le a saunoa i lenei aso, tatou tapuaia ma ave pea le avanoa e saausi ai. E le faigofie foi tapenaga ma le tau faasoia o le taimi ona o le tele o manaoga o itumalo. Ia alolofa foi sui usufono mamalu o le a saunoa, na o se tuualalo ma se faamanatu a le Nofoa, ia tausisia pea tatou Tulafono Tumau, agai sao a outou saunoaga i le tulaga aoaotetele o le tamaoaiga ma faiga faavae tau tupe a le Malo. O le a maua lava avanoa i mea taitasi pe a oo i le iloiloga auiliili. Ia agalelei le Alii i le tatou galuega i lenei aso. Le lagolagosua a Ofisa Sili o Pulega o Matagaluega ma Faalapotopotoga Tumaoti a le tatou Malo, e faatalofa atu i lenei taeao.

Samoa ma lau faafofoga tapuai mai, o le a le toe oo se faamatalaga i ou paia ma mamalu. E faatalofa atu, faamalo le soifua manuia ma le lagi e mama i lenei taeao. Tapuai maia ma le manuia.

TUUIINA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2022/2023 Nu.26, Lipoti Faaletausaga a le Faalapotopotoga o Tau'i mo Faalavelave Faafuasei mo le Tausaga Faaletupe faai'ina i le aso 30 Iuni 2021.

Ma le faaaloalo lau Afioga.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2021/2022 & TULAFONO TAU FAAOFI O LE
FAATATAUINA O TUPE 2022/2023 – felafolafoaiga faaauau i luga o
le faitauga faalua – Aso Fono lona 3**

FOFOGA FETALAI: E tolopo Taulumaga a le Fono Aoao Faitulafono i le po anapo ua maea ona saunoa le sui usufono mo Falealupo. Ia, o le avanoa foi lenei o se tasi o sui usufono e saunoa aua le tatou Tala o le Tupe.

Ia o lea ua matau atu ua tulai mai se tasi foi o sui usufono matua, Honourable Loau Solamalemalo mai le itumalo o Sagaga 1. Ia o le avanoa lea o lau Afioga i le sui usufono mamalu.

Afioga Hon LOAU SOLAMALEMALO KENETI SIO (Sagaga 1): A o le i faia se tala lau Afioga i le Fofoga Fetalai, ia e muamua lava ona momoli atu le faafetai ua maua foi se avanoa faaauau e faapena ai ona fai se tala. E faalua foi pei ona saunoa lau Afioga ma faapena ona molimoli lapalapa o malo i lenei taeao i le maleifua mai ma le alafai mai i faguga lelei o le paia o le Maota nei aua le Fonousu a si o tatou atunuu i lenei taeao. E manatu foi sa momoe lava ma manu ae i ai foi mala e atiae, peitai o lea ua matau i lenei taeao i le alofa ma le agalelei o le Atua.

Ona manatu lea lau Afioga i le Fofoga Fetalai, e ao lava ona faapoi le vagana i alofisa o Tupu nai le vavau i lenei taeao. E manatu foi o lea ua faafotupule le ata i talimalama, ua ee tupu foi poututoa o le Maota nei i lenei taeao. O le ala lea lau Afioga i le Fofoga Fetalai ou te le soona tapoina ai le fala matasoo, aua o Samoa o le ao mamala. O le faautaga a tulatoa ma tula tofia fai mai o Samoa e matafanua i Malaetele ma malae tafunai. O fale tauaitu ma fale tautagata ae siufanua i Laloifo ma Falesau ma Faleomavaega. Fai mai foi o Samoa e matafanua i maota fonoa ae mulifanua i elelesea o le Tonumaipea ma fanuatausi o le Alataua. Ona manatu ai lea o se taofi vaivai lau Afioga i le Fofoga Fetalai, o lea ua papaga ma menamena i tafua ou aneanea ma ou sasa Samoa i ou paia ma mamalu sausaugata. Ou te taofi foi e le tau talatalaina faaupega lavelave ou sa ma faiga.

Ae tau ia ina saua i le va e pei o faiva i malae. O ou paia la ma mamalu Samoa, o paia lava e apoapogata, e amata mai le Matasaua ma le mea e oso ae ai le la, seia paia Fili ma Puletuu na sesema ai manu o Malo. Tulouna ia la paia faale-Malo, aua le afio o lau Afioga i Le Ao Mamalu o le tatou Malo

ma lau Masiofo. Afio lau Afioga i le Sui o le Fono a Sui Tofia ma lau masiofo.

Ae a le Maota nei? Afio lau Afioga i le Fofoga Fetalai. I lena itu o le malu i le afio mai o lau Afioga i le Sui Palemia, tulou ua le nofoia foi le nofoa o le Tamaitai Palemia i lenei taeao ona o le usugafono. Le mamalu i le Kapeneta, Sui Minisita.

I lea tala na atoa i le afio atu o le Sui Taitai o lenei Vaega o lo o agaia le Malo aemaise o sui usufono o le Maota nei. Ae a le tapuaiga i Ofisa Sili o Pulega o Matagaluega o tatou faatasi i lenei taeao.

O paia faale-Talalelei aua le afio ma susu o auauna totofi a le Atua le au Sa Levi, o e o lo o faapena ona faanonomanu ma tapuai aua o tatou faiva aua se manuia o Samoa mo a taeao. Ae a le paia o Samoa ua faapena ona tapuai mai i tuluiga e fia o le kelope i la latou tapuaiga leleoa, tulou, tulouna ia.

E ao foi ona ou faatulou aua le tapuaiga a nai o tatou uso aua le faigamalo a Tutuila ma Manua, i le afio o le Afioga i le Kovana Sili, le Lutena Kovana, le afio o le Fofoga Fetalai ma Maota e Lua o le faigamalo. O paia ia aua Tama ma o latou Aiga, o Aiga ma latou Tama, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. O paia ia aua le Faleagafulu ma le tau Tootoo, Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu na Saelua. Ae a le Faatuiolemotu, le Laau na Amotasi, le Tootoo o le Faleula ma upu ia te oe le Manuatele. O le tapuaiga lea lau Afioga i le Fofoga Fetalai e ao lava ona oo i ai se leo.

E faatalofa atu i lau Afioga i lenei taeao. O le po foi anapo, ou te faamalulu atu ua tatou le faatasi ona o tuatuagia ua le maalofia lau Afioga. Ui o lea, o lea ua malama i ulugalua lenei taeao. E matau atu foi i lena Itu i le alofa ma le agalelei o le Atua i le sagisagi fiafia aua le Fonousu.

Ia, e le faagaloina foi le tapuaiga a si ou itumalo o Sagaga 1 e pei ona faaigoaina ai i lenei taimi. Ui o lea, o se taimi, se itula ona ou oo atu lea i lau tapuaiga, aemaise o le faafofogaaga i Fogaa.

Ia ae pei ona o le auga o aute i lenei taeao ma lenei vaiaso ma lenei masina, ia, se i o tatou faapena ona tatala le tofa ma sasaa faaoti le utu a le faimeaa aua le Tala Faatatau o le Tupe, o le tamaoaiga e faapena ona lufilufi aao i ai le paia i le faigamalo, lufilufi aao lelei, ina ia a? Ina ia mau lava Samoa aua lona tamaoaiga.

Ia, masalo ua leva ona matau ua tagatagai foi le paia o le Maota i le Tala o le Tupe. E le fou foi la i le vaai lau Afioga i le Fofoga Fetalai, iloilo ma le totoa, matau lelei, faale-lelei, ina ia faapena ona tuufaatasia ai lagona ina ia sao ma uli lo tatou sa i lenei Tala Faatatau Autu o le Tupe 2022/2023. O le mea lea, ia, aua foi ne i tee le uluga i lena Itu, e tatalo atu ma le agaga loto maualalo, o le a foi sa matou motugaafa, ia vaatele i lo outou finagalo i lena itu i lau Afioga i le Sui Palemia ma le Aiga Minisita. Avatu ni a matou motugaafa, taatia atu, a lelei, faaoga, a le lelei, ia, o lena tou te iloa le mea

e fai i ai tulou le Maota lenei. A o motugaafa ina ia faapena ona auiliili ma saili lava, e eli lava ina ia maua penina aua Samoa ma lana tapuaiga. O le agaga foi lena o le tootoo o Fogaa i lenei taeao.

Faafetai atu i lau Afioga i le Tamaitai Minisita ma lou auvaa. O lea ua manino auofala pei ona faataatia mai le Tala o le Tupe. E ui lava i le matau, ua tele le suiga, a ou te talitonu foi, e i ai ona mafuaaga. O mafuaaga tuga e pei ona tatou matau i lenei vaitau o le olaga ua tatou ola ai, e le gata o le faamai, a o lea foi ua fetuleni mai ma taua o le lalolagi. Ae aua ia ne i tatou tuuaia i le tulaga e le mafai ai ona faatino a tatou galuega. Faafetai i lau Afioga i le Tamaitai Minisita, malo le tapena, aemaise o lou auvaa i le Ofisa Sili o Pulega ma le paia o le afaigaluega o le Tupe ina ia tuufaatasia se tala e faapena ona auiliili ma le totoa e maua ai ni mafaufauga ina ia fausia ai si o tatou atunuu i lona lelei atoatoa. E manatu foi o lea ua faapena ona taoto i paga foi nisi o fautuaga e pei ona taumafai atu ai lenei Itu, sui usufono na faapena ona sausaunoa, ma avatu foi ni timaiga a o ni fautuaga, o le tatou galuega e fau faatasi, tatou te galulue faatasi aua le manuia o si o tatou atunuu. O lau lea matau lau Afioga i le Tamaitai Minisita o Tupe. Malo. E ui lava o lea e matau ua i ai le suiga, ae taoto atu i ina. O tupe pau, ia, o lena e i ina le tofa. A faapea o lea e faasoa i totonu o le paketi lea, ona tau popoe lea o se taofi, pe auau lau faasoa i le tulaga o lea e i ai a tatou tupe pau, e \$89 miliona.

O le matau foi i le tele o isi Mataglauega, ua faapena foi le fetuunaiga ina ia faapena ona talafeagai. O le popolega o le tootoo o Fogaa, e le auau le faamoemoe e tusa ai ma tupe pau ua faapena ona faaalua i le Tala o le Tupe, a o lea ua i totonu o le tatou paketi. Ioe. Le auunaga, ne i te i ua le lava le latou faasoa. E ui o lea, ia pei ona ou fai atu, tautai ae oe, aua le faamoemoe ia sao ma uli le folauga i lenei tausaga faaletupe.

E momoli le agaga faafetai i le paia o le Kapeneta i lona aotelega. I le matau foi i le fetuunaiga mai le Tala o le Tupe i lena tausaga, ia o lea ua vaai foi i le suiga foi o lenei tausaga. Amuli se tala, ae leaga o lea e faasoa e pei o le Afioga i le Minisita o Tina ma Tamaitai. E momoli atu le agaga faafetai. Se o tala e pei e foliga mai e fai ma tala foi nei pei e malie pe le malie i le faafofoga e faatalasua i nisi o taimi, ae ou te momoli atu le agaga faafetai i lau Afioga. Ua tele lenei faaopoopoga ua faapena ona aumai i totonu o la outou Matagaluega, e \$51 miliona. O le tala lea sa le mafai ona auau le Tala o le Tupe i le tausaga ua mavae, lea na \$11 miliona, ui o lea, o lea ua ato tupe i le fafao e ala i le \$51 miliona lea ua faapena ona faataatia mai. I lona faaogaina, i lona aotelega, ia, ua talitonu foi i ai lenei usugafono. Leaga o au le isi sa fai i ai lau tala i le tausaga lea na tea nei, e le na ma le laina, ae le o se talaula la lau tala, o le tala na ou vaai ina ia faaosofia ai moegaluaga, a la lea ua moni ma ua tino mai i lenei tausaga. Atonu e aoga foi suaga e faaosofia ai moegaluaga ma faapena ona tilotilo po o fea tonu. O le mea lena ou te faafetai ai au i le Afioga i le Tamaitai Minisita o Tupe, ioe, \$51 miliona,

po o fea na aumai ai i lana tofa, ma le loloto o lana suesuega. Ia a lea ua ou matau atu o lea ua i totonu o le Tala o le Tupe. Malo. I le faafofogaaga a si o tatou atunuu leaga o la e faafogafoga tapuai mai, o lea foi ua saunoa manino i ai Afioga i Minisita, tuu atu i o outou aao e fai ai la outou faautautaga tataua ma le tofa loloto aua le manuia o itumalo. E faafetai atu.

O nisi mea e pei o Komiti lea ta te faalogologo atu i ai lau Afioga i le Minisita, ia taatia atu i ina o lena e i ai le tofa, ioe. Aua foi ne i toe faavaemanua ai lau Matagaluega aemaise o lau fuafuaga alualumamao i le tapenaina o Komiti.

Faafetai atu i lau Afioga i le Minisita o Faatoaga ua le o toe po ma le laina, o lea tou te matau i luga o upega tafailagi, o leitio, ia, i le taumafaiga aua e pei o i o le auga o aute lea, e agai atu ina ia faapena ona faaleleia le tulaga lea. O lea ua ou vaai ua, ioe, Talomua faasoloatoa le tatou atunuu, malo i lau Afioga i le Minisita. Ua oo lava i aulotu laiti, o faalapotopotoga, ua Talomua faasoloatoa, ioe. Ia, atonu o le naunautaga o le Afioga i le Minisita ina ia tupu ma ola ma tele ni a tatou taumafa. Ia, se i faamulimuli ane i Fogaa faamolemole lau Afioga, faamau ane i ina.

E faafetai atu i lau Afioga i le Minisita o Galuega, lea foi e matauina lava i auala, tasi lea mea e te lauga soo ai lava Olo i le taimi foi o e Agai o omoomo ma le pupu o tatou auala. Ia, se i e alofa se i fai ma e savali ai aua o lena sa faapena foi ona e ... ioe, matau le atunuu. E i ai lava nai auala lea ou te matau Olo o le a e le toe agai i auala galue. Ia e sao oe, o le tele foi o auala galue na o le ola ai o le mutia ae leai se mea i le agai i uta o le tatou atunuu. A o auala ia i le vaifale, lea foi sa lauga ai le toatele i fetaulaigaala, ia e ese foi le taua lau Afioga i le Minisita. O lea foi ua ou matau ua amata ona galulue i ai le matou pitonuu i uta i Nuu, Tafaigata, Vaitele. E pei o i ina o lo o faapena ona lofia ai le toatele o le mamalu o le tatou atunuu. A lelei auala, ou te talitonu foi o le a faigofie femalagaaiga.

Faafetai i le faasoala lau Afioga i le Tamaitai Minisita i le Ofisa o Aoga, e matau foi ma le totoa. E ui lava ina faapena ona le auau foi pe a fua i ai i tausaga ua alu, ae ou te iloa o le faasoala ina ia taumafai. O le popolega lau Afioga i le Minisita, ia, o le le auau o le auunaga, aemaise lava o aoga i totonu o si o tatou atunuu. O lea ua pau le Tala o le Tupe a le Matagaluega o Aoga, le fetuunaiga o muniao, ia o la e i ai le tofa i le Afioga i le Minisita ma lona auvaa, e fetuunai ai ina ia faapena ona auau auunaga masani a le Ofisa o Aoga. Ou te tautala lava, tulou, sa ou i ai i le Matagaluega, e le faigofie. O totogi o faiaoga, o long service leave, totogi o faiaoga o Aoga Faataitai, o totogi o faiaoga o Aoga Tumaoti ma Aoga a Ekalesia. Ia ou te le fai atu lau Afioga i le Minisita, tasi lea anavatau a la outou faigamalo. A matou tulai mai, o le a totogi e le Malo faiaoga o Aoga Tumaoti ma Aoga a Ekalesia, Mission Schools. E taua, ou te au foi au i ai lau Afioga i le Minisita. Ioe. Na ou taumafai mai foi i le taimi o ou i ai au, o le taua ia o le vaega lea, totogi e le Malo faiaoga o Aoga Tumaoti ma Aoga a Ekalesia. Aisea?

Leaga o alo ma fanau a si o tatou atunuu la e aotauina ai. O lona lua, ia ogatasi ma tutusa lelei levels o faiaoga i aoga a le tatou Malo ma aoga Mission Schools. O le taimi lenei, e matua le taitai ona auau, e matua vala lava le totogi o faiaoga a le Malo ma Ekalesia. O lea la ou te piimama ai i le anavataua e pei ona outou taumafai mai ai e totogi faiaoga a Ekalesia, Aoga Tumaoti pe a oo i ai la outou faasoa. Ia, e le i fausia Roma i se aso se tasi i lau lea matau, le iloa pe o le tausaga lona tolu po o le lona fa po o le lona lima, ae tuu atu lava i ina, o lona e faaaauu ma faataunuu le anavataua e pei ona i ai la outou folafolaga, ou te au i ai, ioe, ina ia totogi faiaoga ia.

Lona lua lau Afioga i le Minisita o faiaoga faataitai, i lalo o le tulafono a le Ofisa o Aoga, o lona ua uma ona faatulafonoina le four years old, ua faatulafonoina e tatau ona i totonu o aoga, ae faapefea la faiaoga? E tatau ona aoga le tamaititi ae faapefea le faiaoga? e tatau ona tatou totogi, it's a must, e tatau ona totogi e tatou. E leaga o la ua uma ona faatulafono ina ia totogi faiaoga o aoga faataitai, ia lafo atu i lona Itu. E pei ona ou fai atu, e toalua nai ou tausoga na matua leaga lava lo matou va, o le mea lea. Ua omai fai mai Loau, o le a ma le palota ia te oe, e manaia le anavataua a le Vaega lea ua tulai mai, o le a totogi matou. E faiaoga nai tamaitai i le aoga a le ekalesia Metotisi, a o le isi e i o i Leulumoega college. Ona ou fai lea i ai, ua lelei, o e fai le mea lona, o lona e sao oulua, palota i le mea e te lua iloa e maua ai le manuia. E oo mai i le taimi lenei, o lea lava e tuitui mai ia te au, ou fai atu, e leai la, e le o au le pogai ae atonu e i ai se taimi oo atu le faasoa. O le mea lea i le faalogologo mai o lau Afioga i le Sui Palemia ma le Kapeneta, se i tagai ane i le vailiu lea, o le taua ia aua le aotauina o alo ma fanau o si o tatou atunuu.

Ua lava foi lea lau Afioga i le Fofoga Fetalai, e le o toe tele foi ni motugaafa. Ou te fia fesiligia lau Afioga i le Sui Palemia, ona o oe lea e gafa ma le tatou uafu. Po o le a se tulaga ua i ai le tatou masini lea e vaai ai oloa e fia maua se tali, ona e taua tele. E matau foi ma le totoia i le tulaga ua i ai nei le fualaau faasaina. Ua faapena ona lofia ai si o tatou atunuu i le tele o soligatulafono e mafua ai. A o lea ua maua le tala e tasi lea vaega o lo o faapena ona agai mai ai fualaau faasaina i totonu o si o tatou atunuu, se i tagai ane i ai ma aumai se tali lau Afioga. Na saunoa ia Olo ananafi ma ia tuuaia ai ia faiga sese a le Faigamalo sa i ai, ua le mafai ona fai se tala ae sa fia fai se tala ona o tulafono. Ae o lea ua maua le avanoa, e fai ai se tala, ona o lea e faapea mai e sese le mea na ave i ai la outou faamuamua, i le auala foi lea i Aleipata ma le auala laupapa i Afega. E matau foi lau afioga i le Minisita, o le auala laupapa i Afega e le mafai ona alofia i le taimi na fai ai, ona ua faaleagaina, a o le tatou atunuu o lona e te silafia le auala tele e malaga uma mai ai, e tatau la ona ave i ai le faamuamua. Ona o la e matau ma faalogologo uma le atunuu, pei e foliga mai e leaga a matou faaiuga na fai, ae o le matau lona lau Afioga i le Minisita. Na ave i ai le faamuamua ona o Afega e omai uma i ai le itu i sisifo o le atunuu i le taulaga, e tatau la ona fai

i ai se fuafuaga lelei, ma e tele taulaga e feoai ai, i lo le mea lea e tupu i Tiavea, o le agaga moni lenei. Na o ta fia tu atu, ae tumu i le faaaloalo lau Afioga i le Fofoga Fetalai tusa ai o Tulafono Tumau.

E fia oo lava se tala lau Afioga e ui ua uma ona fai se tala ma ua fai i ai le faaiuga a le Maota nei, ae tomanatu lava i tua i le afuaga lea e ala ai ona ou tulai ma fia oo i ai se tala lau Afioga. I le agaga ua ala ai ona outou matau ua le mafai ai ona nofoia e le Taitai o lenei Itu ma se tasi o sui usufono. E talu ai lau Afioga i le Fofoga Fetalai, e taua ia te au.....

Tofa Hon Olo Fiti Afoa Vaai: Lau Afioga i le Fofoga Fetalai,

FOFOGA FETALAI: Ia malie le sui usufono mamalu se i tuu atu le avanoa i le Minisita o Galuega ona o lea sa taua i lau lauga.

Tofa Hon Olo Fiti Afoa Vaai: E faamalulu atu i lau Afioga i le saunoaga matagofie i lenei taeao ma tulaga foi o lona finagalo ua faaalua. E leai e tatou te faasoa lava, e moni lava au i le silasila foi a le tatou Faigamalo talu ai foi, i le tulaga na ave ai le faamuamua ona o le feoaiga o le mamalu o le atunuu. Ae ese foi la matou vaaai, o le ese o la matou vaaai o le silasila i le tulaga foi lea o le saogalemu. A fua i ai lau Afioga i le sui usufono, e le i i ai lava se faalavelave ua tulai mai i le auala laupapa i Afega, a o le auala sima lea e i tua i Tiavea, o lenei e te silafia ua tele soifua ua maumau ai. Sa i ai lava le manatu e silasila faapena le tatou Faigamalo foi sa i ail au Afioga, ae e le o lea la matou vaaai. O le ala tonu lenei sa ou avatu ai se faamatalaga i le aso ananafi, ae le o se mea foi e...o la foi e talafeagai la outou silasila i le isi itu, ae ese foi la matou vaaai foi i le isi itu e pei ona ou talanoa atu ma le agaga faaaloalo.

FOFOGA FETALAI: Ou te iloa o lea ua manino lea tulaga, o lea ua faamalamalama foi le finagalo o le sui usufono i lenei foi taimi i le latou foi Faigamalo ma le taupulega, atonu o lea ua manino le mafuaaga. Ua i ai le manatu, e fesoasoani atu pea i le sui usufono mamalu, o lea o le a toe taua mea ua uma ona fai i le faaiuga.

Afioga Hon LOAU SOLAMALEMALO KENETI SIO: E leai ou te le oo i ai i lona aotelega. Ae na ona ou faapai, na ala ona fai le tala, ona o au le tagata sa matua tigaina lava i le va lea, i le taumafaiga ina ia faapena ona sologa lelei le tatou Malo, ma ou oooo lava... o la e silafia foi e nisi o le la itu. Na ou savali lava ma ou oo i le Tamaitai Palemia i sona finagalo faatupu, ae teuteu faatupu, o lenei, le aga faatupu ma le aga faatamalii, na ala ai ona ou faia le galuega. Ae ui o lea, e le o le Tamaitai Palemia na sasi i lau lea matau, ou te faanoanoa i ai leaga e le i nofoia e le na tusia le tusi, ia le aso na talanoaina ai le Lipoti, ae sa ou fia tautala lava i ai. Ae paga lea, leaga e

le i nofoia e le Afioga ia Tuala, le e ona le tusi na ala ai ona mafua le faamoemoe. Ae ui i lea, ua uma ona taoto i Paga le tulaga e pei ona i ai le Lipoti ma aumai. E pei o le agaga lea, aua ana le tusi atu Tuala ia te oe, e leai se mea e tupu.

FOFOGA FETALAI: E i ai le manatu lau Afioga i le sui usufono mamalu, o mea ua tuana'i, ia tatou...ae faafetai o lea ua faailoa mai, tatou talosia mo le agai i luma.

Afioga Hon LOAU SOLAMALEMALO KENETI SIO: O le agaga lena, ae faafetai o lea ua nofoia Tuala, le afioga i le Sui Palemia, ae pei o le agaga tonu lena. E leaga e naunau ina ia faapena ona maopoopo ma lelei lo tatou atunuu. Ae ua ave le tusi lea, ma mea ua toe lagaia ia, o lea la ua tatou faalogo o lea o le a toe o i tai i le faamasinoga ma toe momoli foi nisi o fuafuga i le faamasinoga. Aua ana faapea e gata ai i i, e uma ai lava i i e le mafai ona toe fai. Ae ui o lea, Tuala, leaga o oe o Malaeola lou maota, e ola i ai le pagota. A lea ua matau atu, o oe la le mafuaaga, a o la e tapuai Tevaga ma Vaifale, o lou manumanuga lena o lena e te silafia. E leaga e Malaeola oe, Malaeola au, e faapena le agaga. Ae lelei ona momoli atu pea se agaga measili o lena ua e nofoia mai. E leaga e te le i i le aso lea, ae ana e fonu i le aso lea, e avatu lava se faamatalaga ma avatu se fautuaga, aua le tapuaiga o la e tapuai mai Salemuliaga ma le fetalaiga i le Igoamatua ia Tevaga ma Vaifale.

O le agaga lea, ae ui i lea, a alualu suaga o le vaatele ae toe oo i le faamasinoga, ia....

FOFOGA FETALAI: E leaga o lea ua taua le suafa o le Afioga i le Sui Palemia, se i tulai mai lau Afioga.

Afioga Hon Tuala Tevaga Iosefo Ponifasio (Sui Palemia): O lea ua matau atu lau Afioga o lea ua saunoa tonu mai lava le sui usufono lea ia te au. Ua taua foi tulaga o le matou afioaga, aemaise malae ma tupua ua faapea ona i ai le tapuaiga a si o matou itumalo aemaise foi o si o matou afioaga. O lea e matau atu sa saunoa sa fai sau galuega agai i le Tamaitai Palemia. O lea foi ua e tuuina mai, o au lava le mafuaaga o nei mea. Ou te le alo i le ata o le niu, e sao, e sao lau Afioga. Ae ou te le faia se mea e leai sona mafuaaga. Ou te le faia foi se mea, e leai sona faavae. O le faavae o nei mea lau Afioga, o le tatou Tulafono Tumau, silasila i ai, o le tou tiute lea, o le tiute tauave lea a sui usufono uma lava a lo tatou Malo, silasila totoa i ai. E leaga o lena e pipii i ina lau tautoga, faatino ou tiute i lalo o lau tautoga. O le mea lena ou te faamalulu atu ai i le sui usufono, silasila lelei i ou tiute tauave, a e le faia, e fai atu foi lau tusi ia te oe, ma le faaaloalo lava.

FOFOGA FETALAI: Ua i ai le manatu lau Afioga i le sui mamalu, o le itu lava lea sa ou popoe ai, o le tatou toe agai i tua i mea ua uma ona fai i ai le faaiuga a le Palemene. Ou te talitonu foi o oe o se tasi o sui usufono matua o le tatou Maota, e faamoemoe atu foi le Nofoa i la outou tofa, ona o le toe lagalaga o ia tulaga, ua toe lagalaga mai ai i luga nei mea. Ae ua i ai le manatu, ua tuanai ma ua uma, o galuega lelei foi sa e tapenaina, o lea lava e maua. O le mea lea, e i ai le manatu lau Afioga i le sui usufono, e tuu atu pea le avanoa i le Sui Palemia leaga o lea sa e taua lona suafa. O lea ua saunoa manino lona ia finagalo sa faatino ai fuafuaga i le taimi ua sola. O le mea lea lau Afioga i le sui usufono, faamaea maia lau saunoaga ua uma lou taimi.

Afioga Hon LOAU SOLAMALEMALO KENETI SIO: Ia faafetai lau Afioga i le Fofoga Fetalai, o le agaga tonu e pei ona ou fai atu i le itula ua fano, maumau pe ana faapea e alala ai le Sui Palemia i le aso na talanoaina ai le Lipoti. Ae peitai ane o lea ua maua le avanoa se i fai se faamatalaga. O ou popolega lau Afioga, leaga o lea ua ou maua le tala o la foi ua i toe i tai i le Faamasinoga le moliaga o le Afioga i le Tamaitai Palemia, ma sui Minisita, o lea ua ou faalogo o lea foi uao lona uiga e le uma la le mataupu lea. O le mafuaaga o lea ua ou avatu se faamatalaga, o le tusi a le Afioga i le Sui Palemia. O a fea la e uma ai lau Afioga, a faapea o le tapui...

FOFOGA FETALAI: O le uiga lava lea o le aiatatau a le tagata lau Afioga i le sui usufono mamalu, e le mafai ona tatou taofia. O le mea lea, aua tatou te popole i ia tulaga, tatou tuu i le Atua.

Afioga Hon LOAU SOLAMALEMALO KENETI SIO: Ui o lea, faafetai i lau Afioga i le Fofoga Fetalai, ua ou usitaia foi lou finagalo.

Ona ou manatu lea, o le a seu i fanua se tautalaga a le auauna nei, e tumu i le ava ma le faaaloalo lau Afioga, aemaise o pou o le Maota. E faaali so matou vaivai aua le Tala Faatatau Autu o le Tupe 2022/2023, e avatu ni a matou motugaafa, taatia atu i ina, silasila totoa i ai le paia o le Faigamalo. Maua le avanoa lau Afioga e fai ai se tala aua le tapuaiga a si ou itumalo.

O Fogaa o le nuu, o Fogaa, Aele, Nuu ma Tafaigata, o le nuu lava e tasi o Fogaa ma ona pitonuu, i le afifio o Toetaufanua ma Alo o Malietoa, Maopu ma Tapunuu fetalai i le tagata fou ia Laupa ma le mamalu i le Faletolu. A o le saofaiga foi a le aufaigaluega tofofi a le Atua, o lena foi e afio ai le Peresetene a le Auso ma le Peresetene Aoao a le Ekalesia Metotisi, le susuga ia Faulalo ma lona faletua, aemaise o le Laumua i Fogaa. O Fogaa foi o lo o susu ai le Toeaina, le susuga ia Fili Matalavea ma lona faletua. O Fogaa foi e susu ai le Peresetene aoao a le AOG, po o le Faalapotopotoga a le Atua, le susuga ia Tavita Pagaialii ma lona faletua, aemaise o le loaloa o le aufaigaluega tofofi a le Atua, o lo o alala ma papaaao i totonu o eleelesa o Fogaa. Ua faafetai i la outou tapuaiga, faafetai tatalo, nonomanu aua se lelei

ma se manuia o si o tatou itumalo. Ia talia lupe o Maunu e le o toe mamao, o lea ua uma ona saina le tatou feagaiga, atonu o lea masina ua faapena ona faagasolo atu, aua polokalame fai o le tatou tasi miliona.

E pei o le tala atu lea lau afioga i le Fofoga Fetalai, ia maua le tofa a lau Afioga, faatumu le utu ia faapena ona faafoefoe le tatou Fonotaga. Le paia o lena Itu i le Kapeneta, ia maua la otuou tofa, e lagolagosua aua le galuega a le Tamaitai Palemia, aua le faafoeina o si o tatou atunuu. Le tuualalo foi i le aufaigaluega a lo tatou Malo, Afioga i Ofisa Sili o Pulega o Matagaluega ma Faalapotopotoga, ia maua la outou tofa ma le faautaga aua le lagolagosua i le galuega. O lena Itu o le Malu i le susuga i le Sui Taitai, le mamalu foi o sui usufono, ia maua le tofa ma le faautaga e lagolagosua aua lo tatou Malo. Ia ola le leo o Fogaa, ia soifua ma ia manuia.

FOFOGA FETALAI: Malo faafetai, malo foi le tanoa, faafetai mo le tofa faaalua aemaise foi o le tele o nisi o fautuaga ma taua i le Faigamalo aemaise foi o le Minisita o Tupe ma le Kapeneta. Ua malo le faalaeiau, malo le faalototele, e talitonu lava, o le tele foi o taimi sa e saofai i le Kapeneta i ia futia, atonu e tele foi le lagolagosua aua le galuega a le Kapeneta o lo o faafeagai ai i lena vaitaimi ma tatou talosia uma, ma o tatou galulue faatasi aua le manuia o si o tatou atunuu, o le mea lea malo faafetai.

Ua avanoa foi le tatou... aua se tasi o sui usufono. O lea e matau atu o lea fou mai le sa o Safata 1.

Àfioga LEANA RONNIE POSINI (Safata 1): Lau Afioga i le Fofoga Fetalai, e aufaatasi foi lena itumalo i le faafetai na e siitia i luma o le Atua i lena taeao. E momoli atu ai le agaga faafetai tele. Ua le afio mai le Tamaitai Palemia, a o lea e afio mai le Sui Palemia ma le Kapeneta, Minisita Lagolago aemaise foi lena Itu. Ua faamalo le galulue faamalo le tauatai. O le tapuaiga a Samoa i le susu o lau susuga i Le Ao Mamalu o le Malo ma le Masiifo, susu o le Sui o le Fono o Sui Tofia, seia oo lava i le lautele o le tatou atunuu. Aemaise foi o si o matou itumalo, faamalo tatalo faamalo tapuai, ae se i fai se manatu o le tatou itumalo, i le Tala o le Tupe ua faataoto nei i le tatou Palemene.

E momoli le faamalo i le Tamaitai Minisita o Tupe i le Tala o le Tupe o lea ua taoto nei i luma o le Palemene.

FOFOGA FETALAI: Faamolemole le sui usufono mamalu, e le o se tamai Minisita o le Tamaitai Minisita.

Àfioga LEANA RONNIE POSINI: E faamalulu atu i lau Afioga, i le Afioga i le Tamaitai...

FOFOGA FETALAI: E leaga o lea e i ai faamaumauga o le tatou Fono.

Àfioga LEAANA RONNIE POSINI: E faamalulu atu i lau Afioga, i le Tamaitai Minisita o Tupe mo le Tala o le Tupe o lea ua faataoto nei i luma o le Palemene. E faafetai ua fai lava le mea e gata ai le silafia, aemaise foi le Kapeneta i le faatinoina o le Tala o le Tupe. E momoli foi le faafetai i le Ofisa Sili ma le Pulega o Tupe, malo le galulue e faatino le mea o finagalo i ai le Minisita ma le Kapeneta, i le Tala o le Tupe lenei. E momoli atu ai le agaga faafetai i lo outou ola galulue, aua lava se manuia o Samoa.

Lau Afioga i le Fofoga Fetalai, o nai mataupu ma ni o matou manatu e ala uma atu lava i lau Afioga o lenei usufono. A o lau matau i le Tala o le Tupe, ua ou vaai atu i le Tala o le Tupe lenei e faagasolo, ou te autilo atu i le tusi lea e i, le tatou tefisite foi lea e tau e tatou, po o lea e faapuupuu e vave ona malamalama i ai le Palemene ma le atunuu, o le tupe gau, o le gau a le Malo. O le gau la lea na gau ai nei i le Tala o le Tupe lenei, e oo i le \$103 miliona. A o le gau la lea ua ou vaavaa atu ai nei i le 2022/2023, e \$175 miliona, lea ua gau ai lo tatou Malo. Ona tau matau lea o lea....

Tofa Hon Olo Fiti Afoa Vaai: Lau Afioga i le Fofoga Fetalai,

FOFOGA FETALAI: Ia se i onosai mai le sui usufono se i tulai mai le afioga i le Minisita, leaga o lea ua oo i tupe gau.

Tofa Hon Olo Fiti Afoa Vaai: O se mea e fia faasao, o le gagana lea e pei e suisui taimi. O le 5 tausaga talu ai o saofai ai le sui usufono i le Faigamalo, matou te fiu lava e fai atu o tupe gau, ae o la e fai mai o tupe pau. A o lea ua tuu mai o i le Itu Agai, o la foi ua sau foi o tupe gau. E a pe a see ese ia ma ia upu, e iloa ai le femoumouai o le tofa a lau Afioga i le sui usufono. Ae tatou alu ai i le upu lea sa outou faaaogaina mai, o tupe pau. O e tau maua mai.

FOFOGA FETALAI: O le uiga lena, fesoasoani foi le sui usufono mamalu, ne i tuu faamamafa i lou finagalo, ae o mea lava ua masani ai le atunuu, e le fou foi i le Palemene ia mea o tupe pau, po o le deficit. O le mea lena e fesoasoani ai i le sui usufono.

Onosai se i tulai mai le sui...

Afioga Hon Tapunuu Niko Lee Hang (Vaimauga 3): Ua faafetai mo le avanoa, e le fia faalavelaveina le saunoaga matagofie a le sui usufono mamalu. Ae ou te tulai atu ma le faaaloalo, o le mea lea e talanoa mai ai le taimi lea, o le tupe gau ma le tupe pau. O le mea lea sa i ai i le Nofoaiga talu ai, sa faamamafa mai e le vaega, tupe gau, ona ou tulai lea faasao, e leai e le o se tupe gau o le tupe pau. O mea ia o budget, e fai o estimates, e le tatau la ona tupe gau, aua o estimates. E faasao la le mea lea, aua ne i toe faaaogaina le tupe gau, o le tupe pau, a le lava le tupe, faasoa a le Malo, o le tupe pau.

A tele foi ni tupe o le tupe faasili, o tulaga na, ma aua le toe talanoaina nei mea o lea ua malamalama.

Tofa Hon Olo Fiti Afoa Vaai: Lau Afioga i le Fofoga Fetalai, e faalogologo lelei ma e faafofoga lelei i tama matutua. Ua leva ona Minisita o Tupe ia le Afioga ia Tapunuu. Ia vaai la i le manaia tele o le manino o lea mataupu.

Àfioga LEAANA RONNIE POSINI: Lau Afioga i le Fofoga Fetalai....

FOFOGA FETALAI: Ia onosai mai lava le sui usufono se i fai atu se tala a le Nofoa. O lea ua saunoa se tasi o sui o le Komiti ma o se tama foi ua leva ona galue faa-Minisita o Tupe ma o lo oi totonu foi o le tatou Komiti. O lea ua faamalamalama tonu lava le tulaga ma le uiga o le upu, tupe pau, ona o mea uma nei tatou te talanoa o estimates, o tupe fuafua. O le mea lea ne i te i ua faapea le atunuu, talofa e ua gau atu le atunuu. O le uiga lena aua ne i taitai sese e tatou lauga ia upu o lo o i totonu o tulafono, ma ia manino foi outou o sui usufono ia outou saunoaga. Ia faapena ona faamalamalama, o lea ua saunoa le toe Ulutaia ua leva ona galue i le Minisita o Tupe, o le agaga lena aua le toe faaoga le upu tupe gau, tupe pau. Lau Afioga i le sui usufono faaauau le saunoaga lau Afioga i le sui usufono mamalu.

Àfioga LEAANA RONNIE POSINI: Lau Afioga i le Fofoga Fetalai, o la ua tulai mai le Minisita o Galuega faapea sa i le Malo, e leai o au lea sa i le Itu Agai matou ma le afioga i le Minisita o Faatoaga, o matou lava lea e tuia atua le upu lea o le tupe gau, ae le faapea e...o le afioga ia Tapunuu lena sa i ina. Ae pei e oso faavalevalea le Minisita o Galuega, e leai o tatou lea sa o tatou i i, sa o tatou finau ai i upu ia. Lau Afioga i le Fofoga Fetalai.

Tofa Hon Olo Fiti Afoa Vaai: Lau Afioga i le Fofoga Fetalai....

FOFOGA FETALAI: E leaga o lea ua e toe taua le osovale o le Minisita, se saunoa mamalu o le tatou fono lea e fai.

Tofa Hon Olo Fiti Afoa Vaai: A lea faatoa uma atu nei lava le faamatalaga i le tofa. O lea ua faafofoga le itumalo i le gagana ma le tofa ua lafoai faaatinamafua i le fagaga tulou le Maota. Ia iloa fua i luma fua i tua ia upu. O le mea foi lena na ou tulai atu ai, e ui lava ina outou i le Itu Agai, tou te le i Itu Agai, na o le tofa sui usufono sa Itu Agai, a o outou o se mea foi lele pei e faafoliga lea sa i ina. A o lea ua ou toe fautua atu, faalogo lelei i tama matutua, e sa saofafai i i, i le mataupu lea, e sao lelei. O lea e talanoa i estimates, ana e talanoa mai i actuals e pau le mea lea, ona ou talitonu lea ia oe.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai, e pei o le mea lena o lea...

FOFOGA FETALAI: Se i tulai mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: O lea o le finau inisinia i tupe pau ma tupe... a o lea e nofonofo le Minisita o Tupe.

FOFOGA FETALAI: O le agaga lena sui usufono mamalu. O lea ua e faafofoga mai, o tatou lea e agai i luma le tatou mataupu ma le tatou fonu. O lea foi ua

Ia saunoa mai.

Àfioga LEAANA RONNIE POSINI: Lau Afioga i le Fofoga Fetalai, taatia ia le gau, aua e pei o maua ma le Minisita o Faatoaga lea sa luia le Malo talu ai, pei o lea sa ma taua ai le upu lea, a o lea o le a sui, ona o la ua malamalama foi le Minisita o Faatoaga, o le tupe pau.

FOFOGA FETALAI: Se e te nofo ma tau Minisita ma le ...se i tulai mai lau Afioga o lea ua taua lou suafa.

Susuga Hon Laauli Leuatea Polataivao Fosi: Lau Afioga e na ona ou toe faapulapula le mea lea ua saunoa i ai le sui usufono. E leaga e sese le upu lea sa aumai soo o le deficit. A o le upu sa tatau ona aumai, o tupe e ova ai le faaalu na i lo le tupe maua. O lea la faatoa malamalama le mataupu, o lea ua saunoa tonu i ai Tapunuu. A aumai nei faamaumauga, e leai ma se taimi Leaana na e saunoa mai ai i le mea lea sa ma alalaga ai ma Olo, sa e lagolago lava oe sa lelei mea uma. O si au toe faamalamalama atu lena. A o le faasaoga, e na o Olo, ma au ma Leatinuu sa Itu Agai. A o oe ia sa faapena le mea lea sa saunoa atu ai ia Olo, e na ona e faataga Itu Agai ae le moni.

FOFOGA FETALAI: E i ai le manatu lau Afioga i le sui usufono mamalu, o le a fao lou taimi, ona o le aafia foi o le la itu, ae saunoa sao i le Tala o le Tupe.

Àfioga LEAANA RONNIE POSINI: O le agaga faafetai, ona o lea ua malamalama le Afioga i le Minisita o Faatoaga i le mea lea o le gau. Lau Afioga i le Fofoga Fetalai, a ou vaai la i le tupe pau lea, ona oo ai lea o sou mafaufau i le tulaga ua i ai le tatou tamaoaiga. O nai fesili e fesili ai i le tulaga lea o le tau o le soifuaga, aemaise lava mea taumafa ma mea faufale, o lau lea faitau, o tali i ai lo tatou Malo i le taugata lea ua i ai nei. O tali le tatou Malo i le taugata o pasese o vaalele? O tali le tatou Malo i le taugata o le penisini lea ua i ai nei? A o lau foi lea matau ua faaitiitia tupe ua ave i

Matagaluega, o lea foi ua manino i lau faitau, e leai ni galuega tetele i le Tala o le Tupe lenei. A o lea e matau atu, o le matua tele lava o le tupe ova faaalu lea e i ai le \$175 miliona lea. Ua faitau mai lo tatou atunuu i le tulaga o le Tala o le Tupe lea ua i ai, i le tele o le tupe faamaumau, ia le tupe ua faaalu, a o lea e matau i le taugata o le soifuaga lea ua i ai, penisini, tau o vaalele, faaitiitia tupe a Matagaluega, leai ni galuega tetele ma ni atinae.

FOFOGA FETALAI: Ia malie le sui usufono, leaga o lea e...

Susuga Hon Laauli Leuatea Polataivao Fosi: E le tatau ona tuu upu ia e alu talaloga, a lea sa taumafai atu ananafi. O le mea lea tou te atugaluga i ai i le tau o le soifuaga i le suauu, o lena e malamalama mea uma, e leai ni tatou suauu, o fea e aumai ai suauu e utu ai vaalele? E aumai mai le itu Arapi ma nuu la e maua ai suauu, e leai se mea e mafai ona tatou fuafuaina le tau o mea ia. O le siitia foi o le tau a kamupani vaalele, e le pule tatou. O lea e tau togafiti atu nei le auala e foia ai le atugaluga lea e i ai, o se tatou kamupani vaalele. E faapefea ona aumai oloa mai fafo? E tietie mai le vai, e tafefea mai taetafe o le sami oloa ia e aumai mai fafo? Oloa ia na saunoa i ai Fuiono ananafi, e ala ona tatou tapa fua, o le tatou taumamafa i mea mai fafo. A le lava, ua silasila mai? O lea e uunai atu, le atunuu e, tatou toe foi e toto mea aano, fafaga mea fafaga, lea e uunai atu. Lea ua saunoa nei i tupe faaalu le aoga, o se faaalu le aoga le \$51 miliona lea e tau faataavale atu nei? O le a le mea e ave i ai? E ave e atiae ai le atunuu. Na ou fai atu foi ananafi, e \$5 miliona ua uma ona tufatufa ia i latou o lea o le a tatala borders i le aso 1 o Aokuso. \$10 miliona lea e tufatufa uma atu i pisinisi laiti. O le a la le mea lena? O se tupe faaalu maumau? Na ona ou fesoasoani atu i le sui usufono, leaga o lea e faalogologo le atunuu. E mau e faalogologo ma taitaiseseina ai, e le o faia se galuega a le tatou Malo.

FOFOGA FETALAI: Mo le faasaoina o lou taimi, se i tulai mai lau Afioga i le Minisita o Galuega.

Tofa Hon Olo Fiti Afoa Vaai: Lau Afioga i le Fofoga Fetalai, e ese foi le malie o le saunoaga a le Afioga i le sui usufono i le tele o tupe ia e faaalu ae leai ni atinae. O le agaga tonu lena o le faigamalo na tau seisei mai ai nai tupe ia e tau faa... aua atinae a le atunuu, aemaise la mea ia tau suavai, o le tele o mea mo auala. O lea e matuai toatele o itumalo ma alaalafaga o lo o manaomia se fesoasoani a le Malo i mea ia o auala, o vai, o eletise ma mea uma, a o lea ua faalogologo atu ma le totoa i le saunoaga a le sui usufono, e pei e faasea i ai i i i le tele o le tupe lea e faaalu i atinae. O lea ua ou faamauina, ma ou te fai atu foi i lau Afioga i le sui usufono, aua ne i maumaua lou taimi e te talosaga mai ai i se mea o le itumalo, ou te le tusia i lalo leaga o lena e te tetee i tupe ia e avatu e fai ai atinae.

FOFOGA FETALAI: Ia, ua i ai foi le manatu mo le faasaoina o lou taimi, se i tulai mai le... leaga o lea ua afaina le Malo i au saunoaga. Tulai mai lau Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga mo le faasaoina o le taimi o le Afioga i le sui usufono. E le tuumamaina e le Malo ituaiga lafoga ia ma lauga faapea. Lau Afioga i le Fofoga Fetalai, na ona tolau a e gau, tolau e taugata le soifuaga. O le fesili i le sui usufono, e i ai la sau fofa a oe lava ia, aua sa fia faalogo le Malo po o le a sau tuualalo, po o le a se fofa a le sui usufono mo Safata 1 i le taugata. E mafai ona e control ina e oe lava ia le suauu lea ua maualuga ai ma e faapea mai e taugata. A e compare ina i Niu Sila ma Ausetalia, e taugofie atu Samoa. A o le uiga o le tala lea e fai atu, se lauga i mea foi ia anoa ae aua e te lauga na ona talau ae leai sau fofa. O le mea lena o lea e fia manaomia e faalogologo i ai le tatou Malo ma le atunuu, aumai manatu anoa. A o le ituaiga lauga lea, o le mea la lea e tupu, a, pei o lauga a matai foi nei e na ona faalogologo lava i le ala. A o le taua, o le Maota lena, aua ne i soona masii lava le tofa ma le faautaga. A alei le igafo a Samoa pe afai le faiva i le tai, aua le soona laei le vaa e fai gofie. Ia o lona uiga lena, o le fautuaga lena. O le tala foi a le isi toeaina i le Maota lena, “Sole, aua e te aigigi i lalaoa lou uto.” Tasi lena upu a le atunuu. Ia, ia manuia le... aumai ni fofa ae aua le aumaia...

Afioga LEANA RONNIE POSINI: Lau Afioga i le Fofoga Fetalai...

FOFOGA FETALAI: Malie le sui usufono mamalu se i fai atu se tala a le Nofoa leaga ua lagalaga le tatou Maota aemaise o le faigamalo, leaga o le upou lea na e taua o tupe faaleaoga le paketi lea ua fai. O le itu lena tatou te faaeteete i ai tatou sui usufono mamalu, aua tatou te tau faaleaogaina le finagalo o le Malo ina ia manuia le atunuu. O lea ua faafogafoga le atunuu. O le ala lena o lea ou te fesoaoani atu ai i le sui usufono mamalu, ia, se tau faatoeaina matua le tofa. O lea faatoa maea atu nei lava le saunoaga a Honorable Loau, o se tasi foi o sui usufono matua o le Maota. A outou faafogafoga e ese le manaia o fautuaga, e ofi gofie. A o le mea lea le sui usufono mamalu, ua matau foi e le Nofoa, ua matau foi e le Nofoa tulaga ia, e ono vevesi ai le Maota.

O le mea lea, ia tau tuutumamao le tofa. Lau Afioga i le sui usufono mamalu, o lea e faafogafoga lou itumalo.

Afioga Hon Toelupe Poumulinuku Onesemo (Minisita mo Fesootaiga ma Faamatalaga Vavave Faaneionapo): Lau Afioga i le Fofoga Fetalai pe maua se avanoa faamolemole?

FOFOGA FETALAI: Malie le sui usufono, se i tulai mai le Minisita mo le faasaoina o lou taimi.

Afioga LEANA RONNIE POSINI: Lau Afioga o lea ua e saunoa mai e...

FOFOGA FETALAI: Malie, onosai mai leaga o la e ua tulai mai le... e agai i le saunoaga po o se isi faamalamalama po o le...

Afioga Hon Toelupe Poululinuku Onesemo: O le mea e fia faamalamalama ona o la e faafogafoga lo matou itumalo. Ta te popole lava i le itu lea.

FOFOGA FETALAI: Saunoa mai lau Afioga i le Minisita.

Afioga Hon Toelupe Poululinuku Onesemo: Na pau lava lea o le agaga lea e tau avatu, e tau tulei atu ai foi le tulaga foi lele o tekonoosi. E pei o le agaga lena lea e tulai atu ai pe a maua se avanoa, ona o lo o faafogafoga Falealili, a e tago e google le tau o le penisini i Ausetalia, e \$2.06. O lona uiga, toetiiti lava \$4. A e tago e google le penisini i Niu Sila, e \$2.13. O lona uiga, ua ova foi ua \$3.05. Ma le faaaloalo lau Afioga.

FOFOGA FETALAI: Ia, ou te iloa o lea ua manino lea tulaga lau Afioga i le sui usufono mamalu. Ia see ese ia ae faaauau le saunoaga i nisi mea taua.

Afioga LEANA RONNIE POSINI: Ia, faafetai tele i lau Afioga i le Fofoga Fetalai, ona o lea ou te talanoa i le \$175 miliona lea ua ova ai le faaaoaga, ae o lea pei ua lui mai i fesili. Afai foi o le tau o le penisini i Niu Sila ma Ausetalia, se aua le faatusatusa fua tatou ia Niu Sila ma Ausetalia, o Ausetalia ma Niu Sila e maua lava le tamaoaiga. O le tali puupuu lena.

Afioga Hon Toelupe Poululinuku Onesemo: Lau Afioga i le Fofoga Fetalai, na ona faamanatu lava o lea na saunoa le Afioga i le Minisita o Faatoaga, o i ina lea e fua i ai le tau, o lo o aumai fafo le tatou penisini, e le o i ai ni tatou penisini o faia iinei. Ma le agaga faaaloalo.

FOFOGA FETALAI: Ia, se le sui usufono mamalu, tautuana ma oe, e te fiu lava e te talitali i o, e tasi lava le tala a le Malo, ia, o lena. See ese ia i se isi tulaga e...

Afioga LEANA RONNIE POSINI: Faafetai lava i lau Afioga i le Fofoga Fetalai.

Ae o le a ou oo i le Matagaluega o Aoga. Faafetai tele lava i lau Afioga i le Minisita, o lea foi ua ou vaai ua faaitiitia tupe e ave i le tatou Matagaluega o Aoga. So o se Malo lava e oo foi i le tatou Malo e ave i ai le faamuamua, ae o lea ua matau ua pau i lalo le tupe e ave i ai. Aua o lea e talitonu tatou, o se atunuu manuia, ia o se atunuu lena e ola aoaoina. A o lea lau Afioga i le Minisita i le tatou Iunivesite lea o Samoa, le NUS, e tele tagata ua fai mai ia te au i le taimi lea na fai ai le latou resitala, lea sa faaaoga i ai upega tafailagi lea. O matou i tua... ona avatu lea o le mea lea, ona avatu lea i le telefoni ae le mafai ona toe tali mai i ai, ona o lea o tamaiti tau sue se photocopy e photocopy ai aumai i fafo e print toe tusilima toe o toe sue le scanner e scan ai ona faatoa oo mai lea i le Ofisa o le NUS. Lau Afioga i le Minisita, se i e silasila ifo i ai. E oo foi i le resitala la e i ai, o le matua taugata lava o le resitala. Ae ou susesuea atua le resitala e taugata ona o le kalena lea toetiiti 300+ itulau, ae ou susesue atua, na o le 20 lava i le 30 itulau e mafai ona manaomia e le tamaitiiti, a o lea ua matua taugata ai le tau o le resitala. E le faaaogaina uma e le tamaitiiti le 300+ itulau ia e faitau i ai, e tatau ona faalaitiiti e faalaitiiti ai le tau o le kalena lea ma faalaitiiti ai le tau o le resitala. Aua o pili o le tatou Iunivesite, ia o lena ua e silasila i ai, ua oo i luga i le tai \$1000 tai \$2000 le tau o pili lea e i ai nei i le taimi lenei.

E tuu atu ai i lau Afioga i le Minisita o Aoga, o le isi mea ua ou matau, na ou vaai atu, na ou asiasi atu foi i le aoga lea i polokalame lea tau matata eseese, o le tele o tamaiti fou la ua aooga ai, ua siitia uma lava i luga numera o tamaiti ia e i ai. A o lau vaai atu i le Tala o le Tupe, o lea e agai i lalo. A o aoga ia faa-matata eseese, o le matua taugata lava o mea e faatino ai. O le tala moni lava i lau Afioga i le Minisita, masalo pe ono i le fitu masina ua leai ni mea e fai ai aoga a tamaiti aua e toatele. A toatele tamaiti aoga, e tatau foi ona tele se tupe e ave i ai, a o la e lava e tumau. O lau lea faitau, ou te masalo e oo atu ia Tesema ua leai se tupe, na ona usu lava o tatou tamaiti i le aoga a ua leai se faamoemoe, leai ni mea e faatino ai, aua o aoga nei, e manaomia lava mea e faatino ai. Se i e silasila ifo i ai lau Afioga i le Minisita o Aoga.

O le Soifua Maloloina. Faafetai tele i lau Afioga i le Minisita. Pau lava lea o le faafesili i lau Afioga, o afea ea e faatino ai le falemai o Saanapu ma Falelatai? Ua matua leva lava ona taatia. E talosaga foi i lau Afioga, afai foi o i ai se faafitauli faalotoifale, e manaia le saunoa mai o lau Afioga. A ua uma ona pasia, o lea ua alu le lua tausaga o lenei Paeaiga, e leai lava ma se mea o tupu.

Lau Afioga foi i le Minisita, o le taavale lea na e afio atu ma lau Afioga, le taavale a le falemai e avatu i le falemai o Saanapu. Ia na fai le fonu a le matou nuu ma le anoano o tagata Lefaga ma... i le taavale lea na e afio atu e foai atu, e leai ma se taavale o tu i Saanapu, lea sa lotea i le fonu a le nuu. Lau Afioga i le Minisita, se i e silasila i ai, lea na e matua afio atu lava i ai, a o lea e matua leai lava se taavale.

FOFOGA FETALAI: Ia, le sui usufono mamalu, leaga o lea ua taua le Afioga i le Minisita o le Soifua Maloloina. Lau Afioga i le Minisita.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, sa faatalitali lava e i ai le taimi e tali atu ai ae leaga o lea ou te vaai ma matau o lo o fia maua vave lava e le sui usufono se tali.

Lau Afioga i le Fofoga Fetalai, e taua tele mea ia e laga e le sui usufono, leaga e tasi ia mea taua, o le faafesili i le taimi e fai ai le falemai a Saanapu. O lea foi la ou te fesili atu i le sui usufono, sa saofai iinei na afua ai ona... ia, na toso mai lava i le taimi lena le faiga o le falemai. O le a le mea sa le fesili ai faapea i lena taimi? O le taimi lenei i le talanoa i le falemai lea, o la e ua i ai fuafuaga ma o la e ua faagaoioi. Ae afai e faapea le uiga o le sui usufono e faapea lava le taumafai e faaoloataua le atunuu i ana lauga fia lelei, ou te talitonu o le a kolosi foi. Aua e pule lava le Minisita i ana polokalame ma faagaoioiga. A o la e ua i luga o le...

O le taavale lea e te taua lau Afioga, se o le tiute lena o oe o le sui usufono. O le a e taumafai la e lipoti mai o le galuega a oe ma au o le meatotino a le Malo, a. Na ou maua tala, o lea ua ou faatonuina le Matagaluega, ia saili le taavale lea e te saunoa ai. O le taavale lava ia na tuuina atu mo Saanapu, mo Saanapu. Afai la e le o iloa e lau Afioga le mea o i ai, a o lea faatoa e lauga mai i le Maota e faailoa mai. O le mea la e sili ona ou ofo ai, e te fia leo lagona vaeatu le... ae te le alu e fai sau galuega e saili. O la e i tua i le tou itumalo le taavale, e le i i ai foi se faatonuga a le Minisita e alu ma le avetaavale le taavale. A o i la e iloa ai le mea e tau o le tofa e malu ai le falemai. Afai la o lau Afioga i le sui usufono o lea ua e molitu mai lea pito, e le i i ai ma se taimi ua ta feiloai ai e te afio atu i lou ofisa pe te faailoa atu, se lau Afioga i le Minisita e i ai le mea lea e faaletonu. E leai, e leai se mea e tasi. Na ou alu atu foi i tua e momoli atu le taavale, e te le i afio ai foi. E ese le taua o le mea o le faafesagai o le mea o le sui usufono, aemaise tulaga... e le faapea e momoli atu e le Minisita ona tau ai fua lea o le Minisita. E leai, o la e ua avatu i aao o alii ma faipule, leaga sa matou feiloai ma toaina matutua. Ou te le i vaai i lau Afioga. A o lea la e oo i lipoti faapea, o le tiute o le mea o le sui usufono, e tataua ona ta fesootai. Ia o le agaga lea. Ae ua uma ona faataoto fuafuaga uma lau Afioga i le Fofoga Fetalai.

O lea foi e i ai le talosaga a le lisi o le falemai, aua o le mea moni lava lau Afioga, atonu e le i oo i ai lau sailiiliga, ae na ou taunuu loa ou tapa loa le lisi, e 35 tausaga talu ona faavae le falemai i Saanapu, e le i i ai ma se lisi e tasi. O la e la na ou faatonua le aiga e ou fanua lenei, ia fai mai. O lea la ua i ou lima le faafanua o le fanua ma le tele o le fanua ma le talosaga, 35 tausaga. O le ala lea afai e te le o malamalama atili i mea ia lau Afioga, leaga e i ai foi talosaga a le tou itumalo o lea ua ia te au, e te le o vaai lava i se saina a le sui usufono? Ou fai atu lea, vaai le sui usufono e saina mai i mea

ia e lelei ai mea uma. Ia vaai la i le tiute lea ou te faia e sii i luga oe? Vaai e sainsi le sui usufono i mea ia e le mafai ona ou talia pe a le sainsi le sui usufono. Ia manuia le Fono. A o nai faamalamalama na.

FOFOGA FETALAI: Ia, ou te talitonu le sui usufono mamalu o lea ua maua le uiga o mea sa e tuufesili ai, ae talitonu foi o lea ua manino le saunoaga a le Afioga i le Minisita, o le tiute faifaatasi lea o lau Afioga ma le Minisita aemaise o tatou itumalo. Ia o le mea lea, e tatau foi i lau Afioga ona e lagonaina le taua o le tatou valaauina e pei ona saunoa le Minisita, o lea ua faapupula ma faamalamalama ia tulaga.

Ae ua i ai le manatu, leaga o lea ua tatou oo i le tatou taimi malolo, o le a faataatiaese tatou galuega mo le tatou malologa masani se i tatou toe taliu mai, toe 3 minute ona faauma ai lea o lau saunoaga. O le a faataatiaese galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa Faitulafono i le itula e 10:44 i le taeao ma toe faaauau i le itula e 11:27 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Faamalo le onosai i le faagasologa o le tatou galuega. Ua maea paleauau le taligasua a le tatou Maota, faafetai i le tatou Ofisa mo le tapenaga. Ae ou te tapa lau Afioga i le Sui Palemia mo le lafo.

LAFO MO LE FAAAUAUINA O ITULA FONO

Afioga Hon TUALA TEVAGA IOSEFO PONIFASIO (Sui Palemia): Lau Afioga i le Fofoga Fetalai, ua tatou molimauina le lelei o le faagasologa o le tatou galuega pei ona i ai nei. O le agaga faafetai e le gata o le taitaiga e lau Afioga, ae faapea foi le lagolagosua a sui usufono mamalu uma o le tatou Maota. O le ala lea o lou tulai atu e faatu se lafo, *Ina ia faataatiaese Tulafono Tumau 32 mo le suia o tatou Itula Fono mo le Aso Fono lenei e faapea; o le a faataatiaese tatou Taulaumaga i le itula e 1:00 i le aoauli, ona toe tauaofia ai lea i le itula e 6:00 i le afiafi ma faaauau ai seia tolopo i le itula e 10:00 i le po a nanei.*

O le lafo lea ma lou faaaloalo lava lau Afioga i le Fofoga Fetalai.

Faaluaina e le Minisita mo Faatoaga ma Faiga Faiva.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2021/2022 & Tulafono Tau Faaofi o le Faatatauina o Tupe 2022/2023.

FOFOGA FETALAI: Ia, o le a faapena foi ona faagasolo le tatou galuega, e tusa o le lafo ua faamaonia.

E faia le tatou malologa o saunoa le sui usufono mamalu mai Safata 1, ma ua uma foi ona faailoa atu, o le tatou Tulafono Tumau lava o le tausisia o tatou taimi, ma o lea ua uma ona faailoa atu, ia toe 3 minute o le sui usufono. Ae i ai foi le fautuaga a le Nofoa, leaga o lea e faafogafoga le atunuu i le sui usufono mamalu, atonu o le avanoa lenei leaga o lea ua saunoa Minisita e tusa o faamoemoega o le itumalo, ia o le agaga lea lau Afioga i le sui usufono mamalu, ina ia saunoa i tulaga, leaga o lea e faafogafoga le itumalo ma le atunuu. Ia aua foi ne i tatou naunau i le i'a ae masaesae ai le upega, leaga o lo o faafogafoga o tatou itumalo. O lea foi e faafogafoga mai Afioga i Minisita, atonu e i ai se taimi saunoa. A o le agaga lena o le Nofoa, o le tiute lava lena o le Nofoa, o le silasila i tulimanu uma aua lava le manuia o le atunuu, aemaise foi o le tofa a le Kapeneta ma le Malo ina ia manuia itumalo uma o le atunuu.

O le mea lea, o le uiga lea ma le tiute o le Nofoa, e le mafai ona tuua se lagona ona o saunoaga ua agia i totonu o le Maota. E manatu foi, e toe faaleleia lava i a outou saunoaga i totonu o le tatou Maota. O le mea lea, o le agaga lena o le Nofoa.

Ae manatu o lea e i ai le faauilavea a le Afioga i le Minisita o Aoga, e faamalulu atu ai i le sui usufono mamalu, leaga o lea sa taua le Ofisa o Aoga, ia, o le a saunoa lau Afioga i le Minisita o Aoga.

Afioga Hon Seuula Ioane (Minisita o Aoga, Taaloga ma Aganuu): Faafetai i lau Afioga. O le mea sili o lea ua saoialo le taliga o le sua i lau Afioga aemaise o lenei usugafono mamalu. O le mea foi lea e momoli ai le agaga faafetai i le Ofisa e tusa foi o le tapenaga o lenei taeao. Sa leai se manatu e fia faalavelave i le saunoaga a le sui usufono, peitai, e ui lava ina ua tea i tua Apolima, ae faamalulu atu i lea itu. E i ai le lagona, e pei lava foi o upu o le Fono, e fua lava le ta i le tea. Ae momoli le faafetai tele i sui usufono ua saunoa ma amanaia le Matagaluega o Aoga i lenei taeao. Ona i ai lea o le talitonuga, a tuu umi, e iu ina oo atu foi ua galo se faamatalaga e ono fai. Ae manaia lau Afioga ae se i faamalamalama atili nai vaega ia meamanu o maua avanoa e saunoa ai le tatou fonotaga mamalu.

Ua matauina saunoaga a sui usufono o lo o tele ina faapea mai, ua pau le Tala o le Tupe i lenei tausaga i le Matagaluega o Aoga, Taaloga ma Aganuu. Ia e sao lelei, faafetai foi i lo outou amanaia ma faitau manino tatou le Tala o le Tupe. Ae i ai mafuaaga. Manatua foi masalo pe fa masina talu ai sa

lockdown ai le tatou atunuu, o i ina foi na le mafai ai ona faataunuuina nisi fuafuaga tatau a le Matagaluega ona o le tapunia o aoaoga ma galuega foi i lenei taimi. E le gata i le tapunia o aoga, ae faapena foi isi galuega tetele a le Matagaluega sa tatau ona faatinoina ae ua le mafai ona faatinoina i lea taimi. O le mafuaaga lea ua manatu ai le Matagaluega, o lo o i ai seleni e tatau ona lola mai agai i luma i le tausaga faaletupe lenei, ona tapena lea o le paketi e fua ina ia tuutiitia le manao mai i le Malo ae faaoga ana tupe totoe o lo o teuina e faagaioi ai le Matagaluega i le taimi lenei. O isi na itu tetele o lo o mafai ai ona tilofia ma alu le vaai a le Matagaluega ina ia faasoa tatau foi le Malo ia e tusa o ana fuafuaga alualumamao e pei ona i ai i lenei taimi.

Ua aofia i le finagalo o nisi o sui usufono le tatou Iunivesite Aoao o Samoa, ia e sao lelei finagalo. Masalo po o le 5 i le 4 tausaga talu ai, e oo mai lava i le taimi lenei, e le i toe i ai lava se siitaga o le resitala ma le pili o aoga o le tatou Iunivesite. Ia, ona o le manatu foi o le Iunivesite e aumai se faamama avega i si o tatou atunuu. E ui e tele nisi polokalame fou ua faaopoopo i totonu o aoaoga a le Iunivesite, ae le o mafai lava ona siitia ai lona pili aemaise foi o le resitala. Ae faafetai lava i finagalo ua faailoa ua maua ai foi se manatu o le Matagaluega aua le agai i luma.

Ia, o se manatu lea lau Afioga i le Fofoga Fetalai e fesoasoani i le tatou mataupu i lenei taeao. Faafetai lava.

FOFOGA FETALAI: Malo faafetai saunoa i lau Afioga i le Minisita. E taua foi le faamanatu mai a o saunoa foi sui usufono mamalu ina ia aua foi ne i toe afea e se saunoaga, o lea ua manino le saunoaga a lau Afioga i le Minisita. Ma e fia faamanatu foi i le sui usufono mamalu, o le tali lava a le Malo o le tali mulimuli foi lenei ma o le faaiuga foi lenei o se mataupu. Afai lava ae fesili ma finau soo, ia o le solifono ma le faasoesa. E ao lava ona ou faamanatu atu ia tulaga ina ia outou manino lelei i tatou Tulafono Tumau. O le agaga lenei e faatonufofua ai a outou saunoaga ma fetalaiga i totonu o le Maota.

Se i tulai mai lau Afioga i le sui usufono mamalu.

Afioga LEAANA RONNIE POSINI: Faafetai tele i lau Afioga i le Fofoga Fetalai. Ae faaauau atu pea se manatu o lenei itumalo. Ona ou oo mai lea i le Minisita o Tina ma Tamaitai, ou te talitonu o lea ua manino le Afioga i le Minisita i le tulaga foi o le matou itumalo. E pei foi ona tatou feiloai, ia e leai lava se isi pule e i luga atu o le pulega mamalu a alii ma faipule latou te tofia sui o le itumalo aua le Komiti lea e vevesi ai. E silafia foi e lau Afioga, o le itumalo lenei e 3 i ai itumalo na muamua lava resitala. E tau mai ai i ina, sa leai lava se vevesi, sa toamalie uma lava mea ma filemu, ae faaogatonu i le... ua i ai e ua omai ma agai atu i lau Afioga, ae o la e sa sologa lelei lava lenei itumalo. E mafua mai i se a? O le pule mamalu a alii ma faipule, e le mafai ona sosofa e se toatasi, e tofi ai ese toatasi se

komiti i lana lava pule. E leai, e lafo i le pule mamalu. O le ala foi lea o le faataua e le faigamalo talu ai le Tulafono lea e faaofi ai i totonu le pule mamalu a alii ma faipule i totonu o le Faavae. Ae faafetai i lau Afioga i le Minisita, o lea o le a... se i pasia le Tala o le Tupe ona tatou feiloai lea i tua i le matou itumalo.

Ona ou oo mai lea i le Ofisa o Leoleo, lau Afioga i le Minisita o Leoleo, ou te nofonofono lava ma ou mafaufau i le faalavelave lea na tupu lea na maliliu ai tagata e toatolu, tamalii ia leoleo. E lagona lava le ootia o le loto, e faamaise foi i aiga ia na maliliu o latou tamalii ia na lavevea i le taavale. Masalo e atoa le 2 itula o ou tutu ai i le taimi na lavea ai le taavale lea ma aumai ai nai tamalii leoleo ia ua maliliu. A o lau faitau atoa lava i le mea lenei, pei lava ou te lagona, se i silasila lava, a o lau vaai, pei lava ua soli faiga faavae a le Matagaluega ma le Malo, aua o le uta lea na aumai, o le fau lava o se faletele lava. A o nai tamalii ia na maliliu, ia mo vaega foi ia e vaai po ua papa matauila ma valivali mea faafou. A ou vaai i le galuega lea na lavea ai le loli lea ma le uta lea na avatu, o le galuega tele lava e toe fai. E i ai faiga faavae a le tatou atunuu, a o lea ua maliliu ai nai tamalii ia o le Ofisa o Leoleo.

E oo foi i le mea lea... O au sa ou lauga i le mea lea o le vaega ai aisa ia ma... o lea pei ua ou faalogo atu e pei o se sosaiete le mea. Na uma ona ou lauga ai ae toe maua foi isi sosaiete ai aisa ia ma faatau aisa pe lua ea lea na sosoo mai. Lau Afioga i le Minisita, se i tau sailiili maea, pei foi o le saililiga o le Tulafono lea talu ai, e oo lava i mea o telefoni ma fesootaiga atu i tagata nei e faia le mea lea, suesue maea uma ifo o lea e mataitu e le atunuu, leaga o le faatupu malaia lea i totonu o le atunuu, o tagata nei. O lea foi na fai ai lau tala i totonu o le Palemene lenei, sue lava, sue lava po o ai le pogai, fai pe le o le Palemene lenei ae se i ma le aa. O lau tala lenei lea na fai i le Fono lea talu ai, leaga afai e le se i atu le faapogai o mea ia, e toe tupu foi. A o le malaia i le atunuu, ua sosolo mai lava le malaia i mea ia o faatauga aisa ia ma aiga aisa ia. Se i silasila totoa ifo i ai lau Afioga i le Minisita i le mala lea ua oo i le tatou atunuu. Ia matua faafoia le faafitauli se i suesue o lea e mataitu le tatou atunuu i le tulaga lea.

Ona oo mai lea i le tulaga o le vaega lea o Faamatalaga ma Tekonolosi, lea ua ou toe vaai atu e i ai le tupe tele lea ua toe ave i ai. Ou te le o malamalama tele po o le konekarate lea na te faia le galuega lea na faamatu i ai le \$2 miliona a o le konekarate foi lea o lea ou te tau matau, lea na tuu sao i ai e le tatou Malo le galuega i ai, ae ua le faasalalauaina. E tele isi konekarate na apalai i ai, a o lea ua tofi sao lava i ai e lau Afioga i le Minisita ave i ai ma le \$2 miliona, a o lea ua toe vaai atu foi i le isi tupe tele lea, lea foi ua toe tuu i ai. I lau lea vaai, se i silasila totoa ifo i faiga faavae a lo tatou Malo, e le o se Malo foi e tulai mai lava le Minisita fai lona finagalo, e leai, o lenei tou te silafia e i ai faiga faavae a le tatou atunuu e faatinoina uma ai galuega a le tatou Malo, e puipui ai tatou seleni, puipui ai tatou, puipui ai le

aufaigaluega ma tulaga faapena. O lea ou te fesili ai, i se taimi saunoa lau Afioga i lea tupe tele ua toe faaalu ai, o lea ou te tuu atu ai le agaga faaaloalo.

E tele galuega a le Ofisa o Galuega. Faafetai tele i lau Afioga i le Minisita i le auunaga lea a le EPC lea ua agai atu i tua, lea e faataua le cash power. O le faamama avega ia o lena mea e o atu avatu i tua i faleoloa, faleoloa lea agai i tua i tagata lautele. Faafetai tele i lau Afioga, o auunaga lelei ia, o faamamaavega ia. Lau Afioga, o lea ua faaauau galuega ia na faapea a uma le Koviti-19 ona faamaea lea, a o lea e matau o lea e te faamama avega i tulaga ia...

FOFOGA FETALAI: Ua maea le taimi o le sui usufono. Faamaea mai le saunoaga.

Afioga LEAANA RONNIE POSINI: Ona oo mai lea i le Ofisa o Faatoaga i lau Afioga i le Minisita, na pau lava lea o lau tuualalo i lau Afioga i au Talomua ia e fai, a o lau autilo, ua oge le atunuu, ua oge le atunuu, a o lea e faasolo Talomua ia. O le mau ou te masani ai leaga ou te nofo i tua, ou te sau ua leai ni tautala i luga o auala. O le faatulagaga o le Talomua, o se mea e matua sili ona lelei. Ae ana lelei la fuafua, agai mai le tausaga lea na tea nei ua faataatia lelei le Talomua a afioaga, o le taimi lenei ua matua selesele lava. E ui lava foi ina e faaleagaina au i luga o le ualesi faasalalau a le TV a le EFKS lea na e faasalauina ua ou taofia le Talomua a le matou nuu, ia o la e faafogafoga mai le matou nuu, o le nuu foi o le nuu tofi, o le itumalo foi o le itumalo tofi. Ae le o se sosaiete lau Afioga i le Minisita. Se a e afio atu, o le mamalu lena o le Palemia ma le Kapeneta. Ae e te afio atu pei e te lafilafi ia te au pe e te lafilafi i le matou nuu, se e faaeaea le matou nuu i lau Afioga. A e afio atu pei oe o le tupu. E faamamalu leaga o lea e te tauaveina le suafa o le Palemia ma le Kapeneta. Ia o lau tuualalo lea i lau Afioga. Ia, e tele lava nisi mea e fia oo i ai lau Afioga i le...

FOFOGA FETALAI: Ia, leaga o lea ua oo le saunoaga i le Afioga i le Minisita, e tatau foi ona tali mai le Afioga i le Minisita. Lau Afioga i le Minisita o Faatoaga.

Susuga Hon Laauli Leuatea Polataivao Fosi: Sa ou manatu lava e le oo sau upu i le tulaga lea ua saunoa i ai le sui usufono. Ia malie le sui usufono, na pau lava lea o le mea na ou manao e faasao, e leai sau upu na ou faaleagaina ai oe i luga o le televise. E leai foi se upu faapea na lafo e tauleagaina ai oe. Sa ou taumafai e faamalamalama le mataupu o lo o va ai le fogavaa i lau Afioga i le sui usufono ma le aufaifaatoaga lea na omai matou feagai, o le faamalamalamaga lena. Ou te le talituaalimaina so o se faifaatoaga e ulufale i lou ofisa. Ia malie lou finagalo, na sulu mai lava latou, ne i e matau mai ua ou le manatu atu lau afioga i le sui usufono. O le fesili

muamua lava lena na ou fai i le asosi lea, o lena e te silafia. O auai le sui usufono i le faamoemoe? E tasi lava le tali, e leai e le lagolagoina matou. Ou fai atu toe o e fai le talosaga e manaomia le lagolagosua faatasi. Ae leai sau upu e faapea ua lafo se uluga faapena.

Lau Afioga i le sui usufono o la e tele le avanoa, a na ou fai atu, ua avea le aufaifaatoaga lena, ua tatala ai le avanoa i lou itumalo i le mea lea o le a faasolo. A lea ua ou fai atu, e uma loa le tatou paketi lea, tatou savali ese loa ma le talomua, ae tatou savavali agai i le uluai seleselega. A o le amataga lena o lea o le a faasolo. O le mafuaaga o lou tautala umi i ai pe a fai le folasaga tali faa-Minisita. Ae malie ia lou finagalo, e aua le faasala nai asosi na, leaga o lea ua e matua e agai lava e faasala. Ou te tatalo atu lena, leaga o lea ua e saunoa mai i le tulaga faapea ua ou.....leai, Leaana ua ou tapa lava, vaai i le mea na fai, taofi le faaaliga i uta i le tou nuu. Sulu mai ia te au ua le mafai ona fai, ou sau aumai i le maketi. O fea la a sulu i ai faifaatoaga a lou itumalo? Matou te le i sosofa, na e taofi loa le nuu, ou fai atu, aua, o lea o le a ou tapena le maketi tou te omai e sulu mai i ai. O le faamalamalamaga lena, o le tali lena ou te le manao ta te faataumatatao, leaga o lena e ia oe le pule, e fai ai le finagalo leaga o oe o le tama o le itumalo. Ae alofa ifo i le aufaifaatoaga, aua le faasala e faaoga lou malosi faa-sui usufono, e faasala ai faifaatoaga o lo o fia manaomia le fesoasoani. O si au faamalamalamaga lea lau afioga i le Fofoga Fetalai.

FOFOGA FETALAI: Ou te talitonu le sui usufono, o lea lava sa ou talanoa atu i le tatou taimi. E leaga o lea foi ua agia i le Maota lau saunoaga i mea ia o aisa ua uma ona ou faatonuina muamua lau Afioga i le tulaga lea. Ona o lea e pei a lilifa le saunoaga i sui usufono o le Palemene i le tulaga lea. E manatu foi i le faafogafoga mai o le atunuu, i tuuaina le Palemene, ae le o i ai ni mau tusitusia ma ni mau faamaonia o ia mea. O le mea lea, ua ou faagataina i i le tulaga lea o le talanoaina o ia mea, ona e afaina ai le faafogafogaaga a le atunuu, aemaise foi o sui mamalu o le Palemene.

Ia faauma maia lau saunoaga ua uma lou taimi.

Afioga LEAANA RONNIE POSINI: Ua faafetai tele i lau Afioga i le Fofoga Fetalai, o lea ua saunoa foi le Minisita, e pau lava lea ua e taua o au lea ou te faia faaiuga a le itumalo, e leai, a lea na ou fai atu, o le pule mamalu a alii ma faipule. O le matou nuu foi o Saanapu, e le pulea e se toatasi, o le pule mamalu a alii ma faipule. O le mea lena lea sa tau faaofi i ai e le tatou Faigamalo i totonu o le Faavae le mea lena. Ae ou te le o faia ni faasalaga o mea faapena. E foi atu le saunoaga, e leai se tulaga faapena. O le matou nuu foi o le nuu e tasi lava, a sau loa le afioga, uma loa. Ae pei o le tali atu lena i lau Afioga.

Lau Afioga i le Fofoga Fetalai, ona o lea ua e faauma lou taimi, e ui lava ua matua uma lou taimi i le tutulai mai o Minisita i le....ae tele nai manatu

e fia avatu i totonu o le tatou Palemene nei, e aoga. O a ni motugaafa e avatu, se o matou lea e tuualalo atu i le tou Faigamalo, a outou le talia, o lena e ia te outou le pule. Ma le agaga faaaloalo faafetai.

FOFOGA FETALAI: Ua faamalo faafetai saunoa i lau Afioga i le sui usufono mamalu. Ou te talitonu foi, leaga o lea ua e tuuaia mai le Nofoa ua faagata lou taimi, e leai, o lea lava e tuuavanao le Nofoa, e po o le a lava, ae tuuavanao atu lava le Nofoa ia outou Afioga. E manatu foi ona o taualumaga lava o tatou Fonotaga, e fua foi le saunoaga i faauilavea o le a tutupu mai ma afaina ai outou taimi. O le mea lea, e faapena le tapenaga a sui filifilia ma sui o le Maota lenei, ia tapena saunoaga, i se tulaga ina ia ofi uma mea o lo o i le finagalo, aemaise o le faafogafoga mai o itumalo. Ae faafetai mo lou sao, o lea ua faafogofoga le Faigamalo.

O le avanoa lenei o se tasi o sui usufono. O lea ua matau atu o lea ua fou mai le sa o Vaimauga 1, lau Afioga Sulamanaia. Ia faafetai o lea ua e afio mai i lenei aso, o lou avanoa lenei.

Afioga SULAMANAIA FETAIAI TAUILIILI TUIVASA (Vaimauga 1): A o le i faia se sao o lenei itumalo, lau Afioga i le Fofoga Fetalai, e muamua ona faatalofa atu ma ofoalofa atu i le paia o lenei Maota. O le Maota i Tiafau fai mai o le Maota e sufi ai le tofa, aemaise le faautautaga. E faatalofa atu i lau Afioga i le Fofoga Fetalai i lenei taeao. E matau lava ma le totoa i le taitaiina o le Fonousu a le atunuu, ia o lo o matagofie mea uma e ala i le faatautaiga, ia o ou mama na.

E faatalofa atu foi i lena tala na atoa, e ui ina le afio mai le Afioga i le Tamaitai Palemia mo fonotaga foi faale-Malo, o lena e afio mai lau Afioga i le Sui Palemia, lau Afioga Tuala, aemaise le afifio i Afioga i Minisita, ia faapea foi Minisita Lagolago.

Ia liliu mai i lenei Itu e faatalofa foi ma ofo alofa atu i lau Afioga i le Sui Taitai, aemaise o sui usufono mamalu o lenei Palemene. E faatalofa atu foi i le Taitai o lenei Vaega ma nisi foi ua fai i ai le faaiuga a lenei Maota, o le tatalo lava ia vave se taimi e tali ai le Atua e ala i le Maota lenei i se faaiuga.

Ae le i faia se sao o lenei itumalo i le lufilufiina o le tamaoaiga o si o tatou atunuu, e muamua ona faatalofa atu i le tapuaiga a le Afioga i Le Ao Mamalu o le Malo ma le Masiofo. E faatalofa atu foi i le tapuaiga a le Sui o le Fono o Sui Tofia ma le Masiofo, faapea foi le afioga i le Faamasino Sili ma le faletua. E faapea foi le Peresetene o Faamasinoga ma le faletua. Ae a afioga i Alii ma Tamaitai faamasino o Faamasinoga e lua.

E faatalofa foi lenei itumalo i le maualuga o le tapuaiga a le aufaigaluega paia a le Atua i so o se Fatafaitaulaga. O outou o lo o nonomanu i le Atua e ala i le tulivae ma anapopogi i le Atua aua se manuia o Samoa aoao.

E le mafai foi ona faagaloina le tapuaiga a Samoa, tama ma tina matutua o lo o taputapu mai i maota ma laoa, e le gata i Samoa nei, a o atunuu mamao.

Ia tapuai maia, ae le mafai ona alu le lauga a lenei itumalo ae le i faafeiloai atu foi i si ou itumalo, Vaimauga 1. E mai lava i Fusi ma Fanuatanu le afioaga e afio ai le Afioga i le Saofaapito ia Leniu ma ona alo, Aiga paia o Salevalasi, aemaise foi o lau fetalaiga Fuatimau ma Ituala e fia o Tuisamau. E a le tapuaiga a si ou nuu i Lalotea o le Malae o le faautugatasi a Tumua e afio ai Tuliaupupu o le fofoga o le Alataua, afio ai lona usoalii, Teii matua ma alo o Malietoa, e faapea foi alo o Tuliaupupu. E a lau fetalaiga Maualetaua ma le nofo ituaiga ma oe Tuisamau. E a Niniva ma Punialavaa ma Falepoulima e afio ai Falefiaoalii, aemaise foi le Gataiala le Maopu, aemaise le Matua, e alalatai i ai oulua o Lefau ma Tupuanai, aemaise o le Nofoaituaiga ma le mamalu ia Saleupolu. E a si o tatou nuu i Fagalii, au Pilioua ma Faletolo ma Falepouiva, e afio ai le la tama o Tuisugaletaua, Luamanuvae, e alalatai i ai lau fetalaiga Pulemagafa. E a lo oulua toalua Leatutagaloa ma Puna, o oulua na talia le tanoa, Nofoituaiga faapea le mamalu ia Saleupolu. Ia tapuai maia se i fai so tatou sao i le lufilufiina o le tamaoaga o si o tatou atunuu.

Lau Afioga i le Fofoga Fetalai e fia amata se tala a lenei itumalo, i manaoga, ne i te i ua faauilavea mai foi lena itu, ou te le i oo i si ou itumalo, ona ou faamuliai lea i le Tala o le Tupe.

Lau Afioga i le Minisita o Galuega, e masalo e tele ma anoanoai manaoga foi o lenei itumalo sa tuuina atu i le tausaga ua tuanai. Se i silasila ifo i tatou auala galue. O le itumalo lenei e leai ni auala galue, ua agai uma i uta tagata ona o le fefefe i le sami, aemaise foi o mala faale-natura, se i silasila ane. E amata atu lava i Fagalii, ua agai i uta o nofoaga na e manaomia ai se auala e toe fai o la e i ai, ae ua matuai malepe lava i le Matagaluega lea o le Suavai, pe a o atu e tatala le faamama, ua sau ai i luga o le auala. Ia se i silasila ane i auala tuloto foi a Fagalii, e alu atu i Vailele auala tuloto e agai i uta, ia se i silasila ane lau afioga. E faapena foi i le nuu lea o Letogo, o auala e agai ai i uta, ma tulaga foi o auala taloto sa fai ai i le taimi lea o le Samoa Land, ia ua matua mafatia lava, e faapena foi i Vailele. O auala foi e feoai ai i totonu lava o le aai ma totonu lava o tuloto i totonu o le afioaga lava o Vailele, ia faapena foi. Ia aemaise foi o le afioaga lea o Lauili, se i silasila ane, aemaise lava le pitonuu mai o si o matou nuu o Lauili, ua matua malepe lava le auala ona o le nuu lenei e faamanuiaina mo le suavai. A papa nei le vai, e sau i le ato i luga ma malepe ai le auala. O le tatalo lena i lau Afioga, o lea foi na maua o lea ua ia te oe le malosiaga o taligalu. Ua fiafia lava si o matou itumalo ina ua...o le Paeaiga ua tuanai na faasilasila ai e le Afioga i le Tamaitai Palemia lea ua i ai nei, o le a fai taligalu a le nuu lenei o Lauili. E oo mai i le taimi lenei, e leai lava ma se mea. E faafetai lava i le Atua i le alolofa o lenei itumalo i le sui usufono lenei. O lea ua toe oo mai i totonu o le Maota, a o mea uma e leai ma se mea, aemaise le taligalu lea sa ioe ai le Afioga i le Palemia sa i ai, le Minisita o le MNRE. O lea e toe tatalo atu ai lenei sui usufono, lau Afioga i le Minisita lea ua matau ua tuuina atu ia te oe

le malosiaga lea, se i e alofa ifo i si ou nuu lea o Laulii. O le afioaga lea e leai se aau, o le ava atoa, a fafati la ia galu, toetiiti fafati i tuamaota, aemaise le tulaga o le siisii o le tau. E pei ona ou fai atu, aemaise foi o le sau o le sami, a o le sau o vai mai uta, se i silasila ane lau afioga.

O si o matou nuu lea o Fagalii lau Afioga i le Minisita o Felauaiga, o lo o i ai le auala lea e alu atu i lalo i le va o Fagalii ma Vailele, se i silasila i lena auala, o le tele o taimi e agai atu ai le mamalu o le atunuu, e agai i uta i le aoga o le Samoa primary, ae ou te vaai lava ma le.....e faafetai lava e le o tupu ai se faalavelave. Ae o i ina lea e pei ua alofaga mai i ai pe a o ifo i tai i le main road, a o se auala vave lena, ae pe le mafai ona fai ai se auala laupapa. Pe le faia foi sau faiga fou e alu atu lava i i, ea ifo i o i Letogo ma Vailele se auala e alu atu faapena i luga. O le talosaga lena e tuuina atu i lau Afioga i le Minisita.

O le tulaga i manaoga o lenei itumalo e le tagisa. E le tagisa lenei itumalo, na o le agaga o le avatu o le tuualalo. O lena ua ia te outou le Faigamalo, se i silasila ane. O matou fanua, faafetai ua maua, ua taunuu i fanua le Afioga i le Minisita o Eleele po o le Minisita o le Samoa Land. Ae talosaga atu, o lea e maua e lenei itumalo la outou faalauiloa, ina ia toe faamatuu lava eleele o itumalo ia sa i ai i le taimi o le Uesetete, e toe tuuina atu lava e galueaina. O lea la sa uma le Paeaiga ua tuanai, sa tatalo lava lenei sui usufono i le tulaga i le \$10,000 ae manaia loa le tuusaunoa mai loa, aua o lea ua outou, o le tatou matafaioi lena sa i ai, ia toe tuu mai lava eleele o afioaga ma itumalo e galulue ai. O le tatalo lena i lau Afioga i le Minisita, po o ai lea e vaaia ifo i le taimi lenei. Ae faafetai foi ua maua tala ua taunuu i fanua le Afioga i le Minisita o le Samoan Land.

O le Tala o le Tupe e talanoa lava ma le faaeteete, ou te faatusaina foi lenei Tala o le tupe o se tulaga i le tusi o le Tusi Paia fai mai e lulu lava ma loimata, ae selesese lava ma le alaga fiafia. E vaai i le utiuti ma le le tagolima o si o tatou Malo, o tupe e faatino ai mea e fai i totonu o si o tatou atunuu. Ua maua foi tala, o le tele lava o tupe lea e i ai o tupe lava e aoina i totonu o si o tatou atunuu. E momoli ai le agaga faafetai i lau Afioga i le Minisita aemaise o le Minisita Lagolago, faapena foi ona faafetai atu i le Ofisa Sili fou ua tulai mai, o le teine o lou itumalo. E afio foi ma alala i fanua ua i ai i o i Maugafiafia i Vailele, o le fiafiaga lena o lenei sui usufono, ia o ou mama na, aemaise o le Pulega o le Tala o le Tupe le Matagaluega o Tupe. E le faigofie le lufilufiina o le tamaoaiga. Ua ou vaai i ai i le taimi sa i ai foi i le Malo, e maea loa ma pasia le Tala o le Tupe i lenei vaiaso po o le vaiaso fou, toe galulue ai foi le Matagaluega e toe faasoaso ma toe faatino le isi mea i le isi foi Paeaiga lea o le a sau nei, i le isi tala faale-tupe. E le faigofie, o lau lava vaai ma le alofa, o lea e le o tele se tupe e aumai i fafo e faatino ai a tatou fuafuaga. Ae momoli lava le agaga faafetai i le tulaga lea. E pau lava le tuualalo a lenei itumalo, aemaise o lo o maua i le Tala o le Tupe o lo o i ai nai siitaga i le tulaga tau tiute o oloa, e pei o le vaega lena e avatu ai le

tuualalo i lau Afioga i le Minisita o Tiute, a faapea o le a toe sii le tiute o oloa i le tulaga e...o le tele foi lena o le faamamafa avega i tagata. Aemaise o lea ua e saunoa, o lea e i ai le lipoti e tuuina mai, e i ai se taimi e sii ai oloa, tiute ia e aumai o pusamoa, pusa mulipipi, tulou o le avamalosi, o le tapaa, ia e popole ai le sui usufono. Aua a sii loa tau ia e le mafai foi ona malolo le aufaipisinisi, e taumafai e tuu i luga le mark up ma mea faapena, e toe sikuea ai lava le tupe. O le tatalo tatou alu ai faapea. Aua o le lelei foi o le leai o ni tiute i na vaega, e mafai foi ona aumai lava e aiga la e i fafo. E faapea, lafo atu pusamoa, e na o le tatou o atu lava e totogi ia le freight ma mea faapena.

O le tulaga i le vaalele, e vaai lava ma le faaeteete i lenei tau, ua i ai le tatou o i Niu Sila ua taugata. Ou te tatalo atu i la outou Faigamalo ua tulai mai, ia toe aumai se tatou vaalele. O lea foi e vaai atu i le tulaga o le tala o le tupe a le Public Enterprises o lea e 6 miliona, o lea e toe alu ai i le totogiina oou te masalo po o le vaalele lea. Ae o lea ua te i lava ua alu lena tupe ae le i faatinoga se auaunaga. O le tatalo toe aumai se tatou vaalele e toe fuafua i ai, ma alu ai i lalo le tau o pasese aemaise o le tatou atunuu e malaga tagata. O lea ua i ai la outou faalauiloa o le a tatala le border ia faafetai. A o le fesili la, a tatala nei la, e faapefea ona omai tagata, pe a faapea o ituaiga pasese ia e te sau ai ma alu i le round trip, toetiiti 3 afe. E le mafai foi ona fia omai tagata pe a vaai mai i le tetele o pasese. O le tatalo a lenei itumalo, se i taumafai e aumai se tatou vaalele, ina ia mafai lava ona pulea e tatou, ma i lalo foi tau o tatou pasese e femalagaai ai si o tatou atunuu.

E faafetai i le Afioga i le Minisita o le Soifua Maloloina, maua foi ua i ai faamama avega ua pau ai lau tupe mo le tulaga o talavai ma mea faapena. E leai lava se isi e le fia faafetai pe a pau le auaunaga. A o le fesili a lenei itumalo, aua o lea e \$10 e vaai ai ma fualaa, ae po o afea e faatino ai? pe pasia loa le tupe faatino, aua o lea e \$10 le mea lea e vaai ai. Pe a pasia loa pe fia? Pe le ua vaai loa i le \$10 ae ua vaai loa i le \$5. O se agaga faafetai lena i le afioga i le Minisita o le Soifua Maloloina. E ese le mataala o lenei Minisita, e momoli ai le agaga faafetai i lenei pau ua tulai mai i totonu o le falemai.

O le isi tuualalo i lau Afioga i le Minisita, e fia manaomia pea e lenei itumalo se update, e toafia ua maliliu i le Koviti-19, e faapena ina ia logologo puialii pea si o tatou atunuu, ina ia mafai ona iloa uma le aofaiga o tagata ua maliliu, ina ia mafai ai ona maua ni faamaumauga mo le agai i luma. Aua o le atunuu lenei o le atunuu ua uma ona faamanuia i ai le Atua. O lea lava e oo mai le faamai, sa o tatou vevesi lava i lena taimi, ia e oo mai le faamai ua i ai le tui puipui. O le ala lena e oo mai i le taimi lenei, o lea lava ua tatou feola ma le faamai, ona o le lava o le tui puipui.

E tatou te faafetai ai pea i le Atua, ona o le tupuaga na tatou tutupu mai ai, lea na sao ai le mea na ave i ai le Faavae. Na ave i ai le faamuamua, o Samoa o le atunuu kerisiano. E faavae i le Atua le Tama le Alo ma le Agaga Paia, lea e oo mai lava i le taimi lenei. E ui lava na pepesi le faamai i si o tatou

atunuu, a o lea lava e vaai atu i le aoina o le masina i lena Itu aemaise o le Fofoga Fetalai ma lenei Itu, ia tatou te viia ai le Atua.

O se tuualalo foi, e faafetai foi i le Minisita o Felauaiga, o lea ua toe foi atu le auaunaga lea sa i lalo o le Ofisa o Leoleo, ina ia mafai ona toe maua pea ni tupe maua a le Matagaluega o le LTA, e faatino ai lava a latou auaunaga. Aua o le isi Matagaluega lenei e manaomia lava le tele o se tupe e ave i ai, e tua i ai manaoga o si o tatou atunuu. E momoli atu ai le agaga faafetai, aua o le tulaga lea ua i ai, e pei o lea ua manaia o lea o le a toe foi i o i le LTA, e faatino ai, ae pau lava le Matagaluega o Leoleo o le vaaiga o taavale ma mea faapena e le o usitaia le tulafono. Ua filiki la le mea o lea ua sao le...faafetai foi i le mataala o le Afioga i le Minisita, ua tulai mai o i le LTA.

O le faafetai a lenei itumalo i le Afioga i le Minisita o Faatoaga, ua maea foi le talomua a lenei itumalo, e momoli foi le agaga faafetai, e masalo o le isi talomua lea o le a fai, o le mea aoao, o le itumalo aoao. E momoli ai le agaga faafetai i le afifio atu foi o le Malo ma lau afioga, ua matagofie ai le faamoemoe o lenei itumalo.

E momoli foi le agaga faafetai i le Afioga i le Minisita o Tina ma Tamaitai, e ala i le faamatuu mai o le \$51 miliona. E le faigofie lenei alafua ua outou faataatia, ae pau lava le tatalo a lenei itumalo, o lea ua vaai atu foi i le tala o le tupe a lenei Matagaluega, o lona uiga a aveese le \$51 miliona, o lona uiga ua pe na o le sefululua miliona, pei e faapena se tupe, ina o lea o le a alu uma i tua i itumalo. E pau lava lau tatalo, ina ia mafai ona faafaigofie taiala lea ua avatu ai i tua i itumalo. E pei e faapena se manatu, e pule lava latou i le faatinoina. Ae ua ou vaai i taiala e fai lava sina faigata, o le tatalo lena e tau avatu, ae ua faafetai. E faafetai foi i lau Afioga i le Minisita, ua maua e lenei itumalo, ua le gata i le luaselau afe ua i ai nei i le account a lenei itumalo o Vaimauga 1, ae ua maua foi ma le faamanuiaga e sefulu afe, o le agaga faafetai lea. E matou te faafetai lava i mea lelei, ma avatu foi le tuualalo mo le agai i luma o le tatou Faigamalo.

O le tau o le soifuaga, ia o le tuualalo lava a lenei itumalo, pe le mafai ona silasila i le penisini, e pei ua \$3.98 i le kiso lea ua i ai. O lona uiga po o le masina fou pe a, ua faalogologo mai foi le Ofisa o le tupe, e masalo pe \$4 pe \$5, e alu alu lava i luga. Ona o le a? O taua ia e fai ma le tulaga foi i le faamai. O le tatalo foi a lenei itumalo pe le i silasila le Faigamalo i nisi kamupani e aumaia i totonu le suauu. Aua o le lelei o ni competition, aua o lea e tasi lava le mea la e aumai ma fua le penisini, e tasi lava le kamupani lea... a o le lelei o le aumai o nisi... pe lua ni vaega e faasafuaina le penisini e mafai ai ona fai le tauvaga faapena. O se tuualalo lava e tuuina atu i le Faigamalo. E moni lava o outou o lo o tulai mai i le foe, a o le faigamalo o tatou uma lava.

O le tulaga foi i le Ofisa o Aoga, ia talofa e ia oe o le Minisita. E matau lava ma le totoa ua i lalo lau paketi. A o le Matagaluega lenei e tatau lava ona ave i luga le tupe, aua e le manaomia ni tupe maua mai. A o i lava e ave,

aua a atamamai ma aoaoina alo ma fanau, ua o se atunuu manuia lea. E momoli atu ai foi le agaga faafetai i le Afioga i le Minisita ona o le tulaga lea sa ou tatalo ai foi i le isi faiga palota, le isi Paeaiga, o le tulaga o tagata asiasi aoga. Ou te toe tatalo atu pea, ina ia ...o le fesoasoani sili lea mo i tatou, o tatou e laiti ia o tausaga ia e litaea ai, aemaise lava faiaoga, e le i taitai le soifua, e mafai ona faaaoga asiasi aoga, e le gata o le tulaga lea, le profession lea o faiaoga, ae faapena foi i tausi soifua, ina ia faaaoga pea i tulaga faapena. E tatalo atu ai, ina ia toe faamalosi pea nai asiasi aoga.

I le tulaga i le Afioga i le Kapeneta, e tuu atu pea le tuualalo, o le toatele o si o tatou atunuu, o lo o faatalitali lava i Ofisa Sili o Pulega o Matagaluega a le Malo. E avatu le tatalo ma le tuualalo a lenei itumalo, ina ia vave ona fai faaiuga ma faalauiloa ia Ofisa Sili o Matagaluega, aemaise lava le Matagaluega lea o Leoleo, e le natia a leai se ulu, e faapena ona le manaia se mea. O le tatalo a lenei itumalo, ia vave ona fai faaiuga ma faalauiloa, aemaise lava o Ofisa Sili o Pulega, ina ia mafai pea ona see le sa, aua o Ofisa Sili o Matagaluega ma Faalapotopotoga, o latou lena o lea e tua i ai. E faafetai foi i nisi o Minisita o lea ua vave ona maua a latou Ofisa Sili o Pulega, o lea ua silasila atu, o outou mama na. O outou o lo o lima ma vae i ai lenei Maota. E i ai foi le taimi tou te afifio mai ai, ma fai foi outou ma sui o outou itumalo, ia faafetai le tautua. O upu lava a le atunuu, e le mafai e le tufanua ona tautua, e na o tupu lava. E momoli atu ai le agaga faafetai, ae o le tuualalo lena a lenei itumalo.

O le tulaga lea na ou talanoa atu ai i le penisini, ia o le tuualalo, po o lava tane, aua o lea ua tatou iloa o lea lava e alualu lava i luga. Pe mafai ona vave aumai ni penisini e reserve tane. A sioti le penisini ona tapa lea o lea e lava lava le tatou reserve.

O le MCIL, e avatu lava le tuualalo i le Afioga ia Leatinuu, ona ua vaai lava i le taugata o le soifuaga. E talanoa lava lenei sui usufono i le price control. O isi malosiaga lea ua fai e isi faipisinisi, a iloa loa o le a sioti le pusamoa po o le a, ona taumafai lea e toe sii i luga le tau. E pe mafai ona avatu pea le tuualalo, ina ia mafai ona toe faamalosi le vaega lena. O le tulaga lea sa i ai foi, o le taumafai ia pule le tagata i le alu i lalo, ae o le taimi lenei, ua eseese, ua faigata ona aumai oloa. E pei o isi metotia na a isi faipisinisi, e faatau uma mai lava ni mea, ona fai lea e i latou, i le taimi e sioti ai le sau o vaa, a o la epe mafai ona toe silasila i le Price Control Board, ina ia mafai ona faatino ai pea le....

Lau Afioga i le Fofoga Fetalai, e pau na o ni manatu o lenei itumalo. E avatu foi le tuualalo i le Afioga i le Minisita o le MCIT, le afioga ia Toelupe, ia se i silasila lava i le tulaga lea i le masau o le tulaga o lo o i ai le internet ma mea faapena. E pei ona ou talanoa foi, e le o i ai se filter e na te faamamaina ma vaai....pe leai se isi o lau vaega ua i ai le tomai faapitua latou te tapeina na mea. O le tulaga moni lava o tatou nei o Taitai, e le gata o taitai a o faauluuluga foi o si o tatou Malo. Ia faafetai lava i le Atua i lo

tatou toa, a o le leaga o le tulaga i le faaleagaina o tatou i luga o upega tafailagi. O la ta ita tatalo, silasila ifo lau Afioga i le Minisita i vaega faapena, ina ia mafai ona tape pe maua foi na tagata o lo o faia pea na mea, o lo o lalafi mai tua. E le matagofie ni taitai o se atunuu, ae faaleagaina e ni upega tafailagi.

Lau Afioga i le Fofoga Fetalai, o le toe manatu o lenei itumalo, o lenei Maota, talofa e, talofa e i le paiaaga o lenei Maota. O lea lava e vaai atu o lea e fai lava, a uma atu lea tulaga, o lea foi ua oo mai e le o maua lava le agaga o le fefaamagaloi. E pei foi ona taua i lenei taeao, o tatou o Taitai, tatou maua le agaga o le fealofani, tatou tuli i luma so tatou ai. O lena foi ia tulai mai outou i le foe, ae matau foi ma le totoa nisi foi o faatalatalanoaga a lena Itu i luga o tv ma mea faapena, o lea lava e sasa lava lenei Itu, e faapena foi i lenei Itu i nisi o taimi. O tatou o Taitai o si o tatou atunuu, ia tatou maua le loto faamagaloi ia ma tatou avea foi tatou ma faaitaiga i nai o tatou itumalo.

Lau afioga i le Fofoga Fetalai, ia o se manatu faatauvaa lena o lenei itumalo. A ua i ai foi se leo ua paopapa i le faafofoga a lenei Maota aemaise le faafofogaaga a Samoa, ia toe foi mai lava i le sui usufono o Vaimauga.

Agalelei le Atua i lau afioga i le Fofoga Fetalai i le taitaiina o lenei Maota e le faigofie lou tulai mai. Ia agalelei le Atua ma maua pea le toa, aemaise le tofa mai i le Atua e taitai ai lenei Maota. O le tou paia i lena Itu i le Afioga i le Palemia ma le Sui Palemia, Minisita ia o lena ua ia te outou ia le taitaiina o le tatou sa. E lelei lava le sae ifo o le tatou sa, ia o la e tatou te i ai uma i totonu. O matou foi ia e na o le tuualalo lava, ae a afaina ia si o tatou atunuu, e le faapea e faaletonu e tau uma lava tatou o le Paeaiaga lona XVII lenei na oo ai Samoa ua sioki meaai ma mea faapena o le popolega lena.

Ao fautuaga ia, ia na o le tuu atu lava i tou autafa a lelei faaaoga, ia a leaga foi ia toe foi mai i le sui usufono o Vaimauga. Ia lau afioga i le Sui Taitai ma lenei Itu, ia ave foi ia le tuualalo, o tatou ia e na o le fautua lava, ia ae o le a foi le tulaga ua i ai ia le taitaiga o si o tatou Malo, ia na ua tagaloa tusi lava ia lena Itu.

Ia o le matou tala lena i lau afioga i le Fofoga Fetalai, ia manuia le Fonousu a le atunuu.

FOFOGA FETALAI: Ua faamalo le saunoa i lau afioga i le sui usufono mamalu mai Vaimauga 1. Ia e talitonu lava sa e toesea foi i nai fonu o lenei vaiaso ona o faatafa gasegase ae faafetai i le Atua o lea ua faafosisia mai ia lou laulelei, ia o lea ua o tatou feiloai i le Maota nei. Ia o le taumafaiga mai lava e fai se sao o le itumalo ia aua lava ia le tatou Tala o le Tupe.

Faafetai, e lagona lava le agaga faafetai i le sui usufono mamalu nei, ia e le i uma lona taimi a o le tele ia ma anoanoai ia mataupu ua saunoa ma ua ofi gofie foi i le faafofogaaga a le Kapeneta ia ma le tatou Malo. O le mea lea faafetai, malo lava mo le momoliga o le tofa ia aua lava le manuia o le

itumalo. Ia o lea lava ua saausi lava ia ae o lea e le i uma le taimi. Malo faafetai, faafetai tapena faafetai foi mo fautuaga, ia lea ua faafofoga ia lo tatou Malo. Malo faafetai.

Ia ua maua foi le avanoa o le tatou Maota ia mo se isi e fia saunoa. Ia o lea ua matau atu ua foi mai le sa o se tasi o sui usufono matua Honourable Lautafi mai Satupaitea. Ia o lou taimi lenei lau afioga.

Afioga Hon LAUTAFI FIO SELAFI PURCELL (Satupaitea): Faafetai i lau afioga i le Fofoga Fetalai mo le avanoa. Ia ae le i faia se tala a le sui usufono mai i Satupaitea. E ui lava ina faatulou i le pau o le Maota nei, Maota i Tiafau nei, Maota e lipoi ai upu a Samoa. O le faautugatagi na ea ai le pologa o Samoa. E faaali ai manatu o Samoa aoao i totonu o le Maota lenei.

Faatulou i le afio o lau afioga i le Fofoga Fetalai, afio o le Sui Palemia faapea le mamalu i le Kapeneta i Minisita, afifio foi Minisita Lagolago, ia ma sui usufono o lena Itu. Tulou foi i lenei Itu i le afio o le Sui Taitai faapea le mamalu o sui usufono o le Itu lenei o lo o taua o le Itu o lo o agaia le tatou faigamalo.

Faatalofa atu foi i le tapuaiga a le Ao mamalu o le Malo ma le Masiofo, afio o le Sui o le Fono a Sui Tofia ia ma le Faletua. Le afio o le Faamasino Sili ma lona faletua ia faapea Alii ma Tamaitai o le Ofisa o le Faamasinoga. Faatalofa atu i le paia o auauna a le Atua o lo o nonomanu i itu e fa o Samoa aua se manuia o le tatou atunuu. Faatalofa i le tapuaiga a Samoa i lona lautele, Tama ma o latou Aiga, Aiga ma o latou Tama, ia le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Faatalofa atu foi i le tapuaiga a o tatou uso mai i Sasae, Kovana ma le masiofo faapea le Kovana Lutena ia ma sui mamalu o Maota e lua. E na ona eseese lava o motu e tatou te nonofo ai, ia ae o tatou lava o ivi ma aano se i tulou. O le paia lea aua Sua ma le Vaifanua, Fofu ma Aitulagi, Ituau ma Alataua, ia Saole ma le launiu na saelua. Afio le Laau na amotasi, Faatuiolemotu ia ma le paia i le Manuatele.

Faatalofa i si ou itumalo o Satupaitea, mai lava i Malaeoga seia paia Falepau, le Susu o Asiata e Falefa ia te oe Tumua, o oe e te tausivaatele, o oe o le vaimalae. Susu lo outou Aiga Samoeleoi o le Aiga na muaimalae i tofiga, Tapui ma Gasu. Afio alo o Lilomaiava Faanana ma Tuimaseve. Afifio lo outou Aiga Sa Valomua ma le Suafa o le Fauatea. Ia afifio Tapaau, alaalatai le Paia ia te Oe le Alataua Tapaulefano, Nofo a Pule ma le Matufia. Ia ae o le paia i faletua ma tausi, saao le malosi o le tatou nuu ia aemaise ia le tupulaga lalovaoa o le lumanai lea o si o tatou itumalo.

Faatalofa atu i auauna a le Atua o galulue i totonu o Satupaitea, i Ekalesia e fia. Faamalo lo outou tatalo, faamalo lo outou taputapu ia aua le manuia mo lo tatou itumalo ia aemaise o nuu taitasi o lo o outou galulue ai. Faafetai

faafetai lo outou tapuai mai, a o alo lo outou sui usufono e fai ia galuega sa outou tofia ai.

O le a oo atu se leo i le Tala o le Tupe, e pei ona taatia nei i le Maota nei. Faafetai i le Tamaitai Minisita ma le Matagaluega o Tupe sa tapenaina ia lenei Tala o le Tupe. Faamalo lo outou taumafai ina ia faasoa lenei seleni laitiiti. Taumafai ina ia faamalieina uma itu ina ia silasila ai lo tatou Malo, e tataua ona ave i ai se tupe e faagaioi ai. Ia talofa i la outou faasoa faalelava.

Lau afioga i le Fofoga Fetalai, talu ona ou sui usufono e ese le Paketi lenei. E ese le Tala o le Tupe lenei. E ese foi lagona i le Tala o le Tupe lenei. O le Tala i le Tupe o lea e tatou te talanoaina i le taimi o lo o tulai mai faafitauli i le lalolagi atoa. Ou te faatusaina e au ia le taimi lenei i le lalolagi, it's a world in crisis. O lo o tulai mai ia atunuu o le lalolagi, atunuu uma lava po o le tele o le tamaoaiga po o le itiiti, ua matua aafia lava, 2, 3 tausaga e tau mai i le taimi lenei. E aafia ai la ma Samoa. O lea e tatou te taumafai e vaevae se tupe i se taimi ua matua aafia lo tatou atunuu.

O lea ou te tilotilo foi i le Tala o le Tupe, o lau tau matau atu lava i le 5 tausaga talu ai, o le tupe laitiiti lava lea e faasoasoa \$700+ miliona. E masani lava ona \$800+. O lona uiga, i le taimi o lea e manaomia le tele o se tupe e tatou te tua i ai, ae o lea ua aliali mai ua faaitiitia ia tatou tupe. E le tau fesiligia foi tulaga o...

Afioga Hon Toeolesulusulu Cedric Pose Salesa Schuster (Minisita mo Punaoa Faanatura ma le Siosiomaga): Lau afioga i le Fofoga Fetalai...

FOFOGA FETALAI: Ia malie lava le sui usufono mamalu, o lea e matau atu o lea e tulai mai ia le afioga i le Minisita o le Siosiomaga. Ia lau afioga i le Minisita.

Afioga Hon Toeolesulusulu Cedric Pose Salesa Schuster: Faafetai lau afioga i le Fofoga Fetalai mo le avanoa. Ia e le fia faalavelave foi i le saunoaga manaia a le afioga i le sui usufono. A ua ou tulai atu lau afioga i le Fofoga Fetalai, ona o lea foi ua toe paia nisi o vaega sa tele foi ona lagalaga ma faaalua i ai manatu o nisi o lauga. E taua lea faapea e laitiiti le tupe atonu o lea ua taua e \$890 pe \$800 miliona e tele ona faaoga i tausaga taitasi. Peitai o le tausaga lenei e na o le \$700.

Lau afioga i le Fofoga Fetalai, atonu ua uma ona silafia e le Komiti ia le faamalamalamaina o le faatulagaina o le Tala o le Tupe lenei. A silasila a outou afioga, e i ai le vaega lea sa masani i tausaga ua tuanai, le General Budget Support lea e ala ai ona siitia ia le tatou grant i le tele i le \$240, \$260 miliona. Peitai ane i le faataatiaina o le Tala o le Tupe i le tausaga nei, lea ua suia ai e le Matagaluega o Tupe ia le faataatiaina, lea ua tuuese le \$84 miliona lea, lea ua i lalo under allocate ese lava ia le vaega lea o le General Budget Support.

O le \$84 miliona lea, a toe alu i le faatulagaina tuai o le Tala o le Tupe, ua alu ai ia tatou External Grant i le \$220 miliona ona taoto mai laia, o le Tala o le Tupe leni, ua laitiiti atu ia le vaega lea e tau e le isi vaega o le deficit po o le tupe faaitiitia. E tusa lea ma le \$90 miliona e faaitiitia ae le \$174 lea e tele ona taua e nisi. Ua laitiiti atu la... ua tele le faasaoina o tupe a lo tatou atunuu i le Tala o le Tupe leni na i lo le Tala o le Tupe ua tuana'i ma isi Tala o Tupe lau afioga i le Fofoga Fetalai.

FOFOGA FETALAI: Ia ou te iloa lea ua faafofoga mai ia le sui usufono mamalu, ia atonu e taua foi ia le fautuaga ua aumai. Ia ae faaauau mai ia le saunoaga a le sui usufono mamalu.

Afioga Hon LAUTAFI FIO SELAFI PURCELL: Faafetai i le Minisita o Siosiomaga. Sa ou faapea o le Minisita o Tupe i le taimi e saunoa ai ia ona faasao mai lea. Ia ona o lea ua matua ou fiu e faitau ua na o mea e alu i lalo nai mea e alu i luga, alu i lalo. O le uiga o lau faamatalaga, o le taimi leni atonu o le ituaiga tupe e tatou te mananao i ai e ova mamao atu, ova mamao atu i luga.

O lea ua ese foi ia le faatulagaina o mea ia o grant receipts ia, lea e aumai i totonu. O i ina tonu lava lea e fia alu i ai se tautalaga i se taimi. Ae faafetai i le Minisita o Siosiomaga i le faamalamalama atili o lea tulaga. O le tulaga lava lea e tulai mai lau afioga i le Fofoga Fetalai, e faamoemoe lava ia tatou tupe e faagaioi ai le tatou Malo, i mea ia o tupe mai i fafo, grants, Budget Support lea e aumai i totonu. Aua a faatu ifo i tupe a tatou lava lea e maua, e le gafataulimaina tulaga na e faagaioi ai ia le tatou Malo. E tatou te faamoemoe lava i tupe ma meaalofo mai i fafo, le agaalofo o tatou paaga ia e aumai ai ia tatou seleni.

O afea e tuu ai lena mea? O lou manatu lena. O afea e tatou te tilotilo ai i se taimi e mafai ai ona o tatou faatupeina ia le tatou tamaoaiga i Tala o le Tupe i tausaga uma e aunoa ma le faalagolago lava se i aumai se fesoasoani mai i fafo. O isi vaega o le Tala o le Tupe ia ua saausi lava lauga. E le toe oo foi i ai sou leo.

Ae o le tulaga nei o le faaletonu o le lalolagi lea ua i ai, ua tataui i ai tatou lava ona o tatou tilotilo i totonu lava o tatou atunuu. Pe o le a se auuala e faatupulaia ai ia le maua o tatou tupe. E mafai ai i se taimi ona faapea, e tatou te le toe faalagolago i le vaega la e i fafo. E faatupe lava e tatou ia tatou Tala o Tupe. Po o le isi 5 i le 10 tausaga, a o manatu na i le agai i luma, a long term vision a le Malo, tatou uma. E tilotilo po o a ni faiga e mafai ai ona maua lea tulaga faapea. Aua tatou te toe faalagolago ia Niu Sila ma Ausetalia ia ma isi vaega.

O le eseese o le tulaga lea ua i ai le faafitauli lea ua tulai mai lau afioga, ona o lo o aafia ai foi latou ia e aumai ai ia tatou tupe i le faamai lea. O lea la ua faaopoopo atu i ai ma le tulaga o le taua lea ua fai, ua aofia uma ai lava

latou. Ioe ana faapea o le afa, e lavea ai lava na o Samoa na e le o lavea Niu Sila, lavea Ausetalia ia ma tulaga na. Ae o la foi e aafia latou. A outou faalogologo foi i tala mai i nuu mamao, e toatele foi ia aafiaga o tagata o le tatou atunuu ma isi lava tagata Niu Sila i le taimi lenei. E faapena foi ia Ausetalia. O lona uiga o na foi e tau faasoasoa ia latou tupe.

Aua la tatou te manatu foi lea e maua mai lava leaga o le mea e masani ai. Ua tataua ona o tatou tilotilo tatou, let us help ourselves. O le taimi lenei i lou manatu, ua tataua ona o tatou mafaufau i fafo atu o le square. Let's think outside of the square. Aua le mafaufau o le mea lava lea, o le mea lava lea leaga o lea ua tutupu mai mea ia, o lea ua aliali mai ai e ono aafia foi ia le alagatupe lea e aumai i fafo, i faafitauli faapenei.

O a mea ia e tu mai i le lipoti lea? E stimulate ai ia le tatou economy. Ia e pei o lea e faamoemoe o le a toe tatala ia tatou borders o le a toe amata ona gaii le machinery of tourism. Ia aua e tatou te tuua uma ia tatou fuamoia i le ato e tasi e pei o lea alagaupu. Tatou tilotilo i nisi auala aua o lea lava e le i gata ia le faamai. O la e alu ia le faamai. Uma atu ia le Koviti-19, ia ae o lea e aliali mai ia isi foi, isi foi variants lea foi ua sau. Ae e le iloa pe gata ai i ina pe leai. O lona uiga, e le i taitai lava ona uma ia aafiaga o le lalolagi i le faamai lenei. Oso mai ma isi faamai fou, aafia ai lava ia le lalolagi, ia aafia ai foi ia le tatou tamaoaiga.

O le vaega lea e tu mai i i, aafia tele ai ia le tatou tamaoaiga, o le turisi. O le tatou Turisi na matua \$500 miliona le tupe e le i toe maua. O le tele o lona tupe talu ai tulaga na tulai mai o le faamai. O le Trade le tatou faatauaiga, Commerce and Manufacture Sector o a tatou Transport Industry. O vaega na o lea na matua aafia lava. O lou la talitonuga, o i foi e tataua ona tilotilo i ai le Malo i ni a latou taumafaiga pe a manao e toe faaolaola le tatou tamaoaiga tatou toe foi i tua i le mea sa i ai ae e le i i ai le faamai. The road to recovery to coast over the years e pei o mea na o lea e tu mai i le lipoti lea e tatou te taumafai i ai. Ae o le fesili la pe mafai ona fai?

O lou talitonuga ua tataua ona silasila i auala e unaia ai le tatou Turisi ina ia toe foi ni tupe i tua e toe omai tagata. O le faafaigata o le mea lona lau afioga, ia...

Tofa Hon Olo Fiti Afoa Vaai: Lau afioga i le Fofoga Fetalai...

FOFOGA FETALAI: Malie le sui usufono mamalu, fai sau malologa se i tuu atu le avanoa i le faauilavea a le Minisita o Galuega.

Tofa Hon Olo Fiti Afoa Vaai: Ia ou te momoli atu le faafetai tele e i ai se taimi ona tali lea o le afioga i le Minisita o Tupe. Ae ua ou tulai ma le faaaloalo lau afioga ona o le tulaga foi lea i lau matau mai i tausaga sa ou i totonu ai o le Palemene.

O lea ua saunoa sao ia le afioga i le sui usufono i le tulaga lea e agai atu ai o le fesili, o le a se tatou mea e fai e faamoemoe ai lava tatou ia tatou? A lea ua o tatou tagatagai mai i le tatou atinae lea ua fai atu i le tai \$1 miliona, e tatou te foi ai i tua i le backbone o le tamaoaiga o Samoa.

Ou te manatua le tausaga 1970 lau afioga e tusa ai ma faamaumauga a lo tatou Palemene, e leai ma se loan. 1970 e agai mai i luga i le 1977, 1978, 1979 leai ma se loan na faia e toeaiina sa o latou asa le gasu o le taeao i le taumafaiga o le tamaoaiga. Masalo o le 1978 i le 1979 lea faatoa fai ai ia latou loan i le Copra Board. O la e i ai faamaumauga a le Palemene ia vaega na. E pau lava lenei o le loan sa faatino e toeaiina ona agai mai lava laia lea i le faasologa o le tatou atinae, faatoa faatino lava i i i le 1980 agai i le 1985 le loan tele lava na fai e le faigamalo a le HRPP. O le loan tele lenei, lea e agai tonu mai lava le sui usufono o le taumafai e unai e na o Turisi ae tiai loa i tua ia le tamaoaiga lea sa tatou tua ai i faatoaga.

Ia o lea foi la e toe agai mai lava ia le afioga i le sui usufono e tulei pea, tulei pea le Turisi. E na ona ou faamanatu atu, a lea na saunoa manino isi sui usufono, o lo o i ai isi faamai faapoopo mai i le Koviti. O lona uiga e maaleale ia le tatou mataupu lea pe a tatou faamoemoe pea. E le tuua ai ia le atinae o le Turisi o la e tapena foi i ai le afioga i le Minisita o Turisi ae na ona ou faamanatu atu i lau afioga leaga o lea ua tele fesili a lau afioga, manaia fesili o le tofa. Ae pei ua ou toe avea i tua ia se faamatalaga, ona o le faamoemoega o le atunuu i ana faatoaga. O lea ua alu atu.

Ia atonu po o le isi 25 tausaga ia ua toe foi Samoa i ana faatoaga ia ua tele lana export. Ia aua o le taimi nei, o nei poloketi e le mo tatou, ae o alo ma fanau lalovaoa o le atunuu. Ma le faaaloalo.

Afioga Hon Valasi Luapitofanua Toogamaga Tafito Selesele: Lau afioga i le Fofoga Fetalai mo le faasaoina o le taimi..

FOFOGA FETALAI: Ia mo le faasaoina o le taimi o le sui usufono mamalu, tulai mai lau afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: E leai se agaga e faalavelave i le... tasi lea tagata poto faapitoa a le HRPP le afioga i le Honorable Lautafi si ou uso a... Ae ese le taua o lana sau i lenei taeao. O le faaupuga lea e aua ne i tuua fuamoia i le ato e tasi e taua ia. A fuamoia ia na tuufaatasi foi i le taimi lea na unai le Turisi ae faagalogalo i atinae faapitoa nei e pei o faatoaga. O lea la ua aliae mai, ua tatama uma fuamoia. Ua le toe i ai se mea e tua i ai na o faatoaga.

O le isi la mea, e pei e faalogologo i lauga a le sui usufono, e pei e lecture mai le tamaloa pei o sana aoga lea e fai mai i le FAST aemaise foi le malo fou. Lau afioga i le... e lelei le lauga e fautua i mea aoga ma aumai fofo e agai i ai ia le tatou Malo. Ia ae o le faaali mai o le tomai ma le atamai, ae o

lea na... ana le faia le iuga tonu ma le lelei a le FAST e toe faafoi ia le vaalele, e faapenei la ua fafa i le tumuai o le atunuu ma o lea lava e taumafai i ai.

Ae tasi lea tagata atamai o le HRPP afioga ia Honourable Lautafi. Ia e pei o le agaga na, aua e te faiaoga mai a ia fautua mai. Ia manuia le Fono.

FOFOGA FETALAI: Ia malo faafetai, atonu o lea foi... e le nofonofo ia le Malo aemaise le Kapeneta e ao foi ona vave ona pai atu i saunoaga ina ia vave ona malamalama ia se mataupu ua tuuina mai.

O le mea lea ia toe 5 minute o le sui usufono.

Afioga Hon LAUTAFI FIO SELAFI PURCELL: Oi sole, te i lava ua uma alii. Ia e leai lava se... silasila le Atua lau afioga i le Fofoga Fetalai. E leai se manatu e faapea e aoai atu lena Itu leai, leaga o le tatou galuega e fau tele. O lea e avatu foi ia ni matou manatu e pei lava o saunoaga ua tea, a aoga, lelei. Ae a leai, ia toe faafoi mai upu a Lautafi ia ia Lautafi. Ao se taumafaiga atu, ona e tatou te fiu lava e tilotilo i mea ia e sau i i, e le agai ai i luma ia le tatou atinae.

O le mea lea ou tilotilo i ai, o faiga ia e fai mai ai e le afioga i le Minisita e tatou te taumafai ina ia toe foi ia le tamaoaga, stimulate our economy. A lea ou te fai atu au, e manaia lena. I lou manatu a tatou tilotilo loa i le isi 10 tausaga leaga ua vave ona oso mai ia Olo. E maua tele ia Olo i le mea lea o lou tu atu lava amata ona tilotilo mai ma faaiviivi mai lona mata.

O lea e le i oo atu lau tautalaga i mea o faataitaiga o mea nei na ona mafaufau i ai. E pei o lea ua ou paia ia le Trade, ua manaomia ia ni tagata faipisinisi e aumai i totonu o Samoa e faagaioi ai ia latou tupe faafaigaluega. O tagata e omai e invest i inei.

Afai o lo o i ai ia tatou Tulafono o lo o aafia ai le faigata ona omai o tagata ia, ia silasila i ai le afioga i le Minisita ma le tatou faigamalo i se auala aua e mautinoa e le lava ia le tupe i totonu o Samoa e faagaioi ai ia ni falefaigaluega e pei o le Yazaki. O ituaiga mea faapena e aumai i totonu o tatou e maua ai galuega a tatou tagata, ma faagaioi ai ia le tatou tamaoaga, ina ia taumafai e oo i le mea lea e fai atu ai pe mata o se miti po o le 10 tausaga ua uma le tatou faamoemoe i fafo.

Afioga Hon Toelupe Poumulinuku Onesemo: Lau afioga i le Fofoga Fetalai pe maua se avanoa...

FOFOGA FETALAI: Malie le sui usufono mamalu leaga o lea ua faauilavea mai ia le afioga i le Minisita...

Afioga Hon LAUTAFI FIO SELAFI PURCELL: Ia o le a uma ifo lava lou taimi i le aualii ia...

FOFOGA FETALAI: Tulai mai lau afioga i le Minisita...

Afioga Hon Toelupe Poumulinuku Onesemo: Faafetai, leai se agaga e faalavelave ia lou tamai sui usufono i le lauga matagofie a le sui usufono o Satupaitea. O se tasi o sui usufono matua peitai e i ai le agaga e ao lava ona fetufaai foi ona o le galuega a le FAST o le galulue faatasi ma le faatuatua.

O le manatu e pei ona saunoa i ai i le Foreign Investment, e pei o se tamai vala lea o le eseesega lea o Faiga Faavae a lena foi Itu aemaise o le faigamalo a le Tamaitai Palemia ma le...aemaise le afioga i le Minisita o Tupe. O le... ae sa saunoa foi le tele o sui usufono i le pisinisi. A silasila i lenei taimi, a ola le pisinisi, ua i ai tagata ua amata ona left out. I le taimi lenei, ua i ai tagata ua i lalo o le Poverty Line, 24% o le atunuu. A 24% o le tatou 200,000 lona uiga ua 40,000 tagata i lalo o le Poverty Line.

A taumafai lava latou i le pisinisi lea, ona alu lea i luga o le tamaoaiga, ae ua tele tagata i lalo o le Poverty Line. O lo o i ai le lipoti sa tapena mai i le 2018 masalo se taimi silasila i ai. Ae o le agaga lea o le faigamalo, e trigger mai ia le tamaoaiga, i tua i nuu ma afioaga i le tulaga ua i ai ia le soifua pagatia lea. Ua i ai lava tagata ua le mafai ona ave tamaiti i le aoga ona ua soifua i le soifuaga mativa. O le agaga lea o lea lava e aumai ia Faiga Faavae, ae o le eseesega lea o Faiga Faavae.

Lau afioga i le Fofoga Fetalai, e na ona faamalamalama atu i le tulaga ua i ai ma le agaga faaloalo.

FOFOGA FETALAI: Ia malo, faafetai, atonu o lea ua manino le taumafai mai o le Kapeneta lau afioga i le sui usufono mamalu. Ia o Faiga Faavae e faapena, sailiili foi ia le faigamalo ua tulai mai ia aua lava le agai i luma ma le manuia lautele o le atunuu. Ia ae ese foi le fuafuaga i lena Itu, ae ese foi le faamoemoe o le Kapeneta ma le faigamalo o i ai nei, ia e leai lava se tulimanu e le o silasila i ai.

Lau Afioga i le sui usufono mamalu, faaauau mai le saunoaga.

Afioga Hon LAUTAFI FIO SELAFI PURCELL: Faafetai i lau Afioga, faafetai foi i le Afioga i le Minisita o Fesootaiga. O le uiga lena o le tala o lea e fai atu, o ni manatu e tuu atu i ina. Afai foi e ese tou faiga faavae, ia faataatiaese. A o manatu ia e le mafai ona tuua, leaga o lea tatou te talanoa i le atinae o le tatou atunuu, o outou ma matou, o Samoa atoa. E le natia la ni finagalo i totonu o le Maota lenei, a tuu atu lava i ina e aoga, lelei, ae a le aoga, ia o lena e i ai tou faiga faavae. A o le atunuu e malosilona tamaoaiga, e malosilona atinae i mea nei tau industries. O lea e taumafai atu ina ia maua mai ni... e le faapea a omai ni pisinisi ona omai lava le fai na o nai tagata, e leai. O le re-prefect o le mea lena, e maua tupe a tagata e faasafua i tua i o latou aiga ma maua ai tupe a nai aiga na. Leaga ua faalavelave mai Olo, a o manatu ia na ou tau fai atu ai, lea e lavea ai le Minisita o Faatoaga. E tasi

lena faataitaiga e tatau ona silasila i ai i le mea lea na ou fai atu, think outside the square, ae ou te le iloa pe iloa e Olo le mea lene, fafo atu o le sikuea. Lea e masani ona... o lea ou te fiafia ai ia Asiata lea, oi, ia Laauli, e sau ma ana idea i isi taimi, pei ta te ata ai. Ae a ta nofo ma toe mafaufau, leai e sao, o mafaufauga faapena i tua atu o le mea e masani ai, lea e faagaioi mai ai, e masani foi ona saunoa mai Laauli i le mea lea o le mechanization. O lou talitonuga, e tasi lene vaega e silasila i ai le tatou Malo i le mea lea ou te taumafai atu ai au, ia fai ni faatoaga tetele, ioe. Aua tatou te fiu lava e fai mea e ave i aiga taitasi ia mea, e subsistence lava lene ituaiga, ae a fai e le Malo ni faatoaga tetele e faafaigaluega uma ai tagata, ona sue loa lea o maketi i fafo, o le sustainable way lene. O le mea lava lea e tupu ia tatou, e le o i ai ni manatu foi lea e sustainable se atinae e gafataulimaina.

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia, malie le sui usufono leaga o lea foi ua e taua le suafa o le Minisita e le mafai foi ona nofonofo. Ia saunoa lau Afioga i le Minisita.

Afioga Hon LAUTAFI FIO SELAFI PURCELL: Leai o Laauli la e sa ou fai atu i ai.

Tofa Hon Olo Fiti Afoa Vaai: Manuia le ma faasoia ma le Afioga ia Lautafi, le Aiga Samoeleoi na mua i malae. Na pau lava lene o le mea na sao mai o lana mua i malae. Ae o le tulaga lea ua saunoa i ai leAfioga i le sui usufono, ua leva ona tatau ona fai, o le taumafai e fai ni atinae e faafaigaluega ai tagata. Ae na ou faalogo atu analeila o faapea mai lana saunoaga i le tulaga o le aumai o tagata faipisinisi foi ia i totonu. Na pau lava lene o lau Tulafono na e faia i lou taimi, o lea e i luga nei le matou talanoaga matou te le talia tele. O lau Investment Bill lea faapea a maua lau \$4 miliona e invest i inei, ona omai uma ai lava lea o le investor ma lona aiga atoa. Ou te iloa o lene e te manatua le Tulafono lea sa outou aumaia, o le Tulafono la lene o lea e teena e le faigamalo lenei, ona ua faigofie ai ona omai tagata eseese, aemaise lava o le umi o le sootaga e omai ai pe a faapea e toatasi se isi e sau ma lana \$4 miliona e invest i inei. Ae ana faapea la e te suia i le tulaga lene i lo outou taimi e matua atinae ni galuega foi lea o ni factories po o mea uma lava lea e te saunoa i ai e faigaluega uma ai tagata o le tatou atunuu ona manuia lea. Ae malo lava, o lene lava ua e toe aumaia le tulaga lene, ia o lea o le a faalogologo atu lava i lou finagalo.

FOFOGA FETALAI: Ia malo. Ou te iloa o lea ua fefaasoai foi le Afioga i le Minisita ma lau Afioga i le sui usufono mamalu, sa e saofai foi i le Kapeneta, ou te talitonu o lea ua malamalama ia itu uma. Ia faauma maia le

saunoaga leaga ua maea lou taimi. Ua e silasila mai ua tu mai le Failautusi e aumai le pepa ia te au ua uma lou taimi.

Afioga Hon LAUTAFI FIO SELAFI PURCELL: Ia faafetai lava i lau Afioga. Pe toe 10 lava minute lea e totoe, e uma atu lava i le 10 minute lea tatou o tatou lunch.

E tau ese lava le mea e sau ai le Minisita lea. O lau tala lea na fai atu Olo i Tulafono ia lea sa i ai. Lea na ou fai atu, afai o i ai ni Tulafono o lo o faafaigata ai ona omai tagata, ia lena ua ia outou le Malo, sui, sui. Leaga o le taimi lea na fai ai, o se taimi muamua, o se taimi muamua lena ua fai ai se Tulafono faapea, la e fai e isi atunuu. Ae i ai foi mafuaaga na ala ai ona taofiofi lava le Malo e faataugata. E i ai foi aulape sa i ai i tagata e mafai ona omai. Ia lena ua e fai mai o la ua i luma o le Kapeneta, e le na o le pau lena o lau Tulafono sa fai i le taimi na ou Minisita ai. E leai, its just one of them, one of many good reports, ailogua e faitau ai, ailogua e faitau ai.

Ia, lau Afioga i le Fofoga Fetalai, leai o le agaga lea e fai atu, lea foi e talanoa mai i mea o loans, ia o lena e iloa ua 8 tausaga e leai se nogatupe na faia e le HRPP. O lea foi ou te tilotilo atu i le... Ou te fai lava ma ou tilotilo i lipoti nei e lua, leaga o i lea tatou te i ai. E i ai taimi ia na faafaigata ai ona fesoasoani mai ai le IMF i le faamamulu mai o tupe a le ADB ma le World Bank e faagaoioi ai le tatou tamaoiga, le taimi lea ua faigata ua utiuti le tatou seleni. Toe oo i le isi tausaga, fesoasoani mai atunuu tetele ia o le T-20 ia Samoa, ia aveese le debt servicing fee ae aumai le tupe lena mo le 2 tausaga e aumai e fesoasoani ia Samoa. Na ala ona faigofie faaiuga na, ona e leai se nonogatupe a Samoa o i ai. O le tulaga lena. A o lea fai mai e... e leai, e 8 tausaga e leai se nonogatupe a le faigamalo. Na ona ou toe foi lava i tulaga ia sa ou talanoa ai. E le mafai ona lelei le tatou turisi pe afai e i ai ni manatu faapea. O le backbone lava lena o tatou faapena ma le agriculture. O mea uma na o lea ou te fai atu, tilotilo i ai le faigamalo faapea ai ma atinae o tatou pisinisi foi lea e faigaluega ai tagata.

O le mea lea faapea o le ave i tua i itumalo, faafetai. Atonu o i ina e maua mai ai nisi metotia tatou te agai ai i luma i se auala e sustainable ai ni pisinisi e fai amata mai tua, ia ona silasila lea i ai o le Malo. O manatu lava ia e avatu lau Afioga, ia atinae le tatou atunuu, i le taimi lenei o lea e faaletonu. O le fuafuaga lea e i ai aua o lea ua 4 masina o le taua lea i Ukraine. Ae o le a le aafiaga lea ua i ai tatou? O lea e fuafua i le faalogologo atu i tala, pe alu i le isi 4 tausaga le taua lenei. Ia se i manatu la lau Afioga i le Fofoga Fetalai, o le a le tulaga o le a i ai tatou? O le a matua aafia lava, o le a matua aafia lava. O lea foi pei ona fai atu, e le iloa lava po o fea e fai i ai le faamai, oso mai nisi faamai, o le a matua aafia lava tatou. A le manatu la i ni tulaga tatou te o ese ai, ia, e matua saisaitia lava le tatou agai i luma. E tele lava le fia tautala lau Afioga, a o lea ou te vaai atu ua ki mai lau mic.

FOFOGA FETALAI: Ioe, ua manatu foi e faauma maia lau saunoaga ua... a i ai lava nisi mea o totoe, o lo o avanoa lava le Kapeneta.

Afioga Hon LAUTAFI FIO SELAFI PURCELL: Ia, ma le isi mea, leai na o... o lea ua ou tautala lava e usitaia tele lau Afioga, le tamaoaiga i lona lautelega, a o lea la ua ou nofonofo ma mea taitasi ia ua outou silasila mai, o mea la ia e auauai atu pe a oo i le taimi e taitoatasi ai e faafesili atu ai.

Ia, o lea foi sa taua e isi tatou sui usufono, na pau lava le saving grace lea e i ai i le taimi lenei i lau tilotilo, o tatou tupe ia mai fafo, o remittances ia e aumai. O le tatalo, aua le lotea. Don't destroy our winning combination, o lea e maua mai ai tatou tupe. Pau le mea e tatau ona fai e alualu ai i luma, toe sue nisi avanoa i Ausetalia, lau i ai nisi tagata. Afai faatoaga ia ou te talanoa atu ai, aumai tamaiti ia ua foi mai faafaigaluega ai i i aua o la e ua omai ma tomami i togamoli, togafala, fai, o mea uma na e ola i Ausetalia, e mafai ona fai i inei. O ituaiga faatoaga na lea ou te fai atu ai, tatou tilotilo mamao, tilotilo mamao i le 10 tausaga o i luma, ia, e atiae ai le tatou atunuu.

Lau Afioga ou te ava tele atu, o le a toe i ai nisi o manatu foi pe a o oi le taimi... ae na pau na o nai manatu e tuu atu i ina. E laiti lava nai manaoga ia i le Afioga i le Minisita o Tupe Maua. Faafetai lava, na ou alu atu i le asiasiga a le matou Komiti o la e nofo mai le Afioga i le Taitaifono, o la e ua sauni le mea e tu ai le tatou masini. Malo, manaia le tapenaga o le mea lena. Ou te vaai atu lava, se e utiuti lava le space e faigaluega ai nai tagata faigaluega. O lau vaai lava lea i le tausaga e 2014 o la e lava e i ai, o kesi lava na, o le environment lava lena. A leaga le environment e galulue ai tagata, e le productive. Ua mautinoa lava lena mea ua prove mai sailiiliga foi a isi atunuu.

O le Minisita si au uo lea ia Olo, lena ua oo atu au tusi, tusa lava pe te le toe tusi mai, ae ou te talitonu ma ou faatuatua, o lena ua e silasila i le talosaga o se matou taligalu, lea na ta talanoa ai, e faapena foi le Afioga ia Toeolesulusulu o se isi o oulua. A o lea ua ou vaai atu o lena ua i ai le tupe lena i lau paketi, o si ou pitonuu lava lea o Vaega, leaga e oo loa ina siisii le sami, e oo mai lava i fale o aiga i le taimi nei. Ae o le mea ia ua tatau ona sau atoa lava mai Pitonuu e tau lava i tai i Satufia le... ia ana fai muamua se isi vaega pe a maua se tupe a lau Afioga.

Faafetai foi o lea ua uma lau auala galue i Vaega, lea na ou tatalo atu foi, si tamai mea lava e sua atu tau loa i le mea lena e faaoga o se mataaga, ia ona tele lea o mea e o i ai tatou turisi. Aua tasi lena mea lea e tupu, e le o lava mea e omai turisi o i ai, ae tasi lena taumafaiga.

FOFOGA FETALAI: Ia faauma maia le saunoaga.

Afioga Hon LAUTAFI FIO SELAFI PURCELL: O lea o le a uma atu lau Afioga. O si au uo mamae lea o Valasi. Faafetai lava ua e taua mai o au

le isi tagata poto faapitoa. Ia, e le see foi le vaa o Lautafi i le malu o le tai taeao, ae ou te fiafia tele ia te oe. Faafetai mo le ambulance lea na avatu ae toe lava o se taavale e feoi ai fomai. O lea foi ua avatu le talosaga i lau Afioga, ia, ma faagasolo ia le faiga o tatou fale e nonofo ai fomai, ua leva ona tautau, ae o lea ua vaai atu pei ua pau i lalo le paketi mai le \$3 miliona i le \$1 miliona, lona uiga na o le tolu fale e lava ai. Ae tuu atu i lau Afioga, o lena na muamua atu lava le talosaga a Satupaitea. Faafetai atu i lou lagolago mai tele i le falemai o lenei itumalo.

Ia, lau Afioga i le Minisita o Tina ma Tamaitai, ia, faafetai. Afai o faafogafoga mai le tatou itumalo, ia o anapo lea na saina ai le feagaiga ma le Minisita ma le Minisita o Tupe, ia ua lalata mai lava le tatou \$200,000. O lea ua ou vaai atu ua ataata mai, ae o tua atu, e pasia loa le paketi lea, ua fotuai mai le tatou \$1 miliona. Ia tapenapena mai i se aso ou te alu atu ai tatou te talanoa, ae faafetai i lau Afioga ua faafaigofie lea vaega.

Ia, masalo ona pau na o nai manaoga faafetai tele i lau Afioga i le Fofoga Fetalai.

FOFOGA FETALAI: Ia malo faafetai. E ava atu lava ia oe o le Tama Matua o le Maota...

Afioga Hon LAUTAFI FIO SELAFI PURCELL: Ou te ava tele atu i lau Afioga, ae faamalie atu foi pe a ua i ai foi se leo ua paopapa po o solitulafono foi lenei foi sui usufono ona o le tele o faauilavea a le alii lea o Olo. Ae faafetai tele i lau Afioga mo le avanoa e avatu ai se leo o Satupaitea i totonu o le Tala o le tatou Tupe. E faamalulu atu, afai ua sasi foi se leo, ia ona o le naunau lava ina ia tatou galulue faatasi, aua o le mea lava lea tout e fai mai ai, tatou galulue faatasi. A o lea e avatu manatu e tatou te galulue faatasi ai ae fai mai e ese tou mea ese matou mea. E leai, o le agaga lena o le Vaega Faaupufai lenei, tatou te galulue faatasi, leaga o le tatou Malo, o le tatou Malo. A avatu lava lelei, ae a avatu e le... ia lena e iloa toe faafoi mai.

Ia, le mamalu o le Fonotaga a Samoa, ia manuia tele tualumaga o totoe o le aso. Ia ua gata ai i le leo o Satupaitea, manuia lo tatou aso.

FOFOGA FETALAI: Faafetai, malo saunoa i lau Afioga i le sui usufono mamalu o Satupaitea malo foi le faaso. Atonu o lea foi ua faafogaga le Kapeneta aua lava le fautuaga. Ia, o lea foi ua taoto i paga le faamoemoe ma le faanaunautaga, o lea foi e le o faagaloina foi le atinae o tatou faatoaga aemaise o turisi e fesoasoani mo le tamaoiga.

Ia, ua ou matau atu o lea ua tulalata i le tatou taimi malolo, sa ou faapea e mafai ona amata ai se isi sui usufono, ae ua ou vaavaai atu o lea ua tulata i le tatou taimi malolo. Ia ua i ai le manatu faapea, ia o lea foi ua i ai le tatou lafo e toe faaauau le tatou galuega nanei i le 6:00. Ia ua i ai le agaga o le Nofoa o le a tatou malolo ia i lenei taimi, ia tapena mai foi nisi o tatou sui

usufono, e le o toe toatele tatou sui usufono o totoe, ia ona oo atu foi lea i le Taitaifono o le Komiti, aua ou te iloa o le Komiti o la ua i ai uma lava o latou finagalo i le Taitaifono mo le latou faamatalaga o le Tala o le Tupe, ia ona faagasolo ai foi lea o le tatou Malo. Ia ae i ai le agaga o le faafetai tele, faamalo galulue i lenei aso.

Ae tatou te le i malolo o lea ua tapena le tatou taumafataga o le aoauli, ia maua foi se faasiligamalosi mo le tatou galuega nanei i le afiafi. Ia o a outou Afioga i Minisita o le Kapeneta o lea foi ua tapena la outou taumafataga ona e i ai foi lo outou tuatuagia aua tiute ma faiva o le Kapeneta, ia, o le a molimoli atu i o outou ofisa.

Ou te faasilasila atu ua faataatiaese nei Taulumaga o le Fono Aoao Faitulafono seia aulia le itula e 6:00 i le afiafi.

Na faataatiaese Taulumaga o le Fono Aoao Faitulafono i le itula e 12:59 i le aoauli.